

YOHANES

Kalε Wĩ a Ndε Ayekĩ Yohanes

Tsελε Ke a

Kalε a Kĩ Kakpa Nkpã.

^I Fomɔ baabɔa katinya ni, Baguma Kalε a deĩ kɔkɔε. Kalε a mɔ Baguma deĩ, ade Kalε a nye Baguma a.

^{II} Kalε a mɔ Baguma deĩ anε kayɔkayi a fomɔ bebɔa katinya.

^{III} Baguma bɔa fɔtsa flee etsãmena ye akũ, ade letsama lelãa kĩ εnε ye liti εbɔa.

^{IV} Kalε a kame nkpã deĩ, ade nkpã kĩ lema batidziwa ɔhaĩ a.

^V ɔhaĩ a avɔle nε ɔtũ kame, ade ɔtũ tãpuli edina ye da a.

^{VI} Baguma do onyole odi kĩ bave Yohanes.

^{VII} Eya kĩ yayaadi adansie nε ɔhaĩ a akũ ayekĩ bati flee aatsã ye akũ betε bido.

^{VIII} Nnέ Yohanes nye ɔhaĩ a, mbom adansie eyadi nε ɔhaĩ a akũ.

^{IX} ɔhaĩ wĩ a kĩ yatε kakpa odi nye odi a, aya nε katinya kame.

^X Kalε a na nε katinya kame, leme tito kĩ Baguma bɔa katinya etsãmena ye akũ malo ni, batidziwa támɔ ye biyi ɔsũ.

^{XI} Eya nε ye mɔawe bati sekε, leme ye bati a tãte ye.

^{XII} Leme bati flee a kĩ betε ye, ade betε ye bido leme a, ekpa be kobε kĩ bedani Baguma babi.

XIII Betádani Baguma babi ne batidziwa kama onukpě, ãye nde ayekĩ otinyole ama babi aye, mbom Baguma moawe lewe kĩ yakena be ye babi.

XIV Kale a dani kekena otidziwa, edzi ne boe kame, ade konyakamo mo onokwali yi ye kame a. Bomó ye kukũkpale a, kukũkpale a kĩ ete nde Olega a Obi moape a aye.

XV Yohanes di adansie ne ye akũ, eboa fowola ele kĩ, “Ade oti kũ akũ foletsa mbi mi kĩ, ‘Oti odi aya ne yĩ liti, leme ebẽ yĩ kitonekĩ edzi nkpã kókoe fomó bema yĩ.’ ”

XVI Ne ye konyakamo beblebee sũ ni, ehila boe flee ekpa boe nhila ete ne nhila akũ.

XVII Mose akũ Baguma mbla a tsã eya, leme ye konyakamo mo onokwali a tsã Yesu Kristo akũ foya.

XVIII Odima támó tǒ Baguma. Ye Obi moape a kĩ eketimo Baguma a, kĩ edeĩ ne Olega sekẽ a, ade ye lenye ayekĩ Baguma la a etsa boe a.

Yohanes Mui Owolane a De Letsã.

XIX Yudafó banokõ ne Yerusalem do be basofó mo Levifó ne Yohanes sekẽ kĩ benaavia ye kĩ, “Nó nye oweí?”

XX Yohanes tásĩ be mbuaye kakpa, mbom ekpale foletsa kame yededeede ele kĩ, “Nné yĩ nye Kristo a.”

XXI Ade bivia ye kĩ, “Kekõ nó nye oweí? Mbóee nó nye Baguma Onukpě Onyene Eliya a?”

Ekpa be mbuaye kĩ, “Oowo, nné ye mané.”

Bibuki bivia ye kĩ, “Nó nye Baguma onukpě onyene a kĩ bele biyi kĩ yaaya a?”

Ekpa be mbuaye kĩ, “Oowo.”

XXII Adeke bibi ye kī, “Kekõ bi boe oti a kī ane, kitonekī kene kī bokoa mbuaye boma bikī bido boe foto a. Owei koū ane?”

XXIII Yohanes kpa be mbuaye nde ayekī Baguma Onukpẽ Onyene Yesaya tsele eyi a kī, “Yī nye oti a kī etsẽ ne kosa kame yaboa fowola a odo kī bekena osi kpĩ bekpa Olate a.”

XXIV Batõ a kī bido bito Farisifo sekẽ a,

XXV via Yohanes kī, “Nte nné no nye Kristo a, ãye Eliya, ãye Baguma onukpẽ onyene a ni, nde sũ akena mui kawola amanie?”

XXVI Ade Yohanes kpa be mbuaye kī, “Yī kõ ni, mawola bati mui, leme odi kī minyina ye dzẽ ne mi kame.

XXVII Ade ye tomõ yī ne liti yaya a, leme ntáfeta kī mawũnya ye mpabua towẽ malo.”

XXVIII Fukĩ flee ya ne foe kame ne Betania omato kame, ne Yordan owõ liti, awã kī Yohanes kawola bati mui a.

Yesu Nyé Baguma Kavelibi a.

XXIX Kī kade nyina a, Yohanes mó Yesu kī yaya ne ye sekẽ, ade ele kī, “Midã Baguma Kavelibi a kī yaakoa katinya kame bati tokpa enamena a!

XXX Ade oti kĩ akũ foletsã mbi mi kī, ‘Oti odi aya ne yī liti, kī ebẽ yī, kitonekī edzi nkpã kokõ fõmõ bema yī.’

XXXI Yī mawae a ntányi oti a kī ye yane, leme ãyaawola bati mui, ayekī maanye ye ntsã Israel kade a.”

XXXII Ade Yohanes le ne Yesu akũ kī, “Mmó Hũhũ Kpalewa a kī eka eto ode nde mbloduma aye eyadzi ne ye akũ.

XXXIII Ne kayokayi a, ntányi ye, lemε Baguma kī edo yī kī nwola bati mui a bi yī kī, ‘Otī a kī aamō kī yī Hūhū a ka eyadzi ne ye akū a ni, ade ye aakōa Hūhū Kpalēwa ewola bati mui a.’

XXXIV Mmó foe lomo, ndi adansie kī ade oti kīi nye Baguma Obi a.”

Yesu Vε Ye Fōtsa Bakolene Batonyade a.

XXXV Luwi leyade a, kī Yohanes mō ye fōtsa bakolene nviā dzē ne awā a,

XXXVI bemó Yesu kī yatē a, Yohanes le kī, “Midā Baguma Kavelibi a!”

XXXVII Fōtsa bakolene nviā a nu fōletsa a kī ele a, foesū bitomō Yesu benaa.

XXXVIII Yesu dani, emó be kī bitomō ye, ade evia be kī, “Litsa miawe?”

Bekpa ye mbuaye kī, “Rabi,” foe kayo nye Fōtsa Ōtsane, “ndia odzi?”

XXXIX Yesu bi be kī, “Miyaadā.”

Loko a aana nde olobe tōdōū ena kame, foesū bitomō ye benamō awā kī edzi a, ade bidzi ne ye sekē olobe a flee a.

XL Fōtsa bakolene nviā a kame omōa nye Andrea, Simon Petro owaēnyole.

XLI Letsa a kī Andrea nya loto ekena nye kī enawe owaē Petro ebi ye kī, “Bomó Mesia a!” De kayo nye Kristo.

XLII Ke liti a, Andrea kpā Simon enamena Yesu sekē.

Yesu dā Simon kenanaana ade ebi ye kī, “Nō dī nye Simon kī enye Yohanes obi a, lemε kito finyaa baave nō Kefas,” ñye Petro. Buñ nviā a kayo nye de.

Yesu Vε Filipino Mō Nataniel.

XLIII Kĩ kade nyina a, Yesu we kĩ yadzakũ enaa Galilea tite akũ, ade emo Filipo ebi ye kĩ, “Yaatomo yĩ.”

XLIV Filipo leme to Betsaida, omato a kĩ Andrea mo Simon dzi a kame.

XLV Filipo mo Nataniel ade ebi ye kĩ, “Bomó oti a kĩ Mose mo Baguma onukpẽ banyene tsele foletsa ne ye akũ ne Katsela Kpalawa kame a. Ade ye nye Yosef obi Yesu, kĩ eto Nazaret a!”

XLVI Nataniel via kĩ, “Fotsa wĩ fudi aapuli fone futo Nazaret leme kame?”

Filipo kpa ye mbuaye kĩ, “Yaadã!”

XLVII Kĩ Yesu mó Nataniel yaya ne ye sekẽ a, ele ne ye akũ kĩ, “Ade Israelni kpanunuunu ne awĩ a, enyé ane kame keke fotsa okenane!”

XLVIII Nataniel via Yesu kĩ, “Nde okena onyi yĩ?”

Yesu kpa ye mbuaye kĩ, “Mmó no kokoe ne koyá kutse a kayo fomó Filipo yave no.”

XLIX Ade Nataniel le kĩ, “Fotsa Otsane, no nye Baguma Obi a. No nye Israel Legã a!”

L Yesu bi ye kĩ, “Ayekĩ mbi no kĩ mmó no ne koyá kutse a kayo sũ mo ote odo a? Aamo fotsa baũ kĩ fobẽ fukũ!”

LI Ade ke ebi be kĩ, “Mabi mi flee ne onokoali kame kĩ míamo ode kĩ ebinya, ade míamo kĩ ode foto banyane aakade bekaka ne yĩ, Otidziwa Obi a, akũ.”

II

Bipi Obolitsõ Ne Kana.

I Ne luwi lalalede akũ a, bipi obolitsõ ne Kana omato kĩ edeĩ ne Galilea tite akũ. Yesu oma na ne awã,

II ade βενε Yesu mo ye fotsa bakolene a leme beya ne obolitsõ kapikõ a.

III Kĩ waĩ woli a, Yesu oma fuã Yesu ebi ye kĩ, “Be waĩ a woli.”

IV Yesu bi ye kĩ, “Otole, nné no aabi yĩ letsa a kĩ nkena. Yĩ loko táwo tõ oto.”

V Yesu oma nabi basumene a kĩ, “Letsa nye letsa a kĩ yaabi mi ni, mikena.”

VI Ayekĩ fonye Yudafo amanie kĩ bavole akũ fomo bawo ne toto kame sũ ni, bake boe topoolo evũ ne toto a kame. Mui fugumi tsetsee ena iye foe elo awo ne lomoa kame.

VII Yesu bi basumene a kĩ, “Minu mui miyula topoolo a.” Foesũ binu mui biyula foe tsononono.

VIII Ade Yesu bi be kĩ, “Minu mui a badi mima oti a kĩ yadãmena funitsã akũ a.” Ade binu badi bema ye a.

IX Funitsã akũ odãmenane a tá mui a kĩ bedani bave a onukpẽ edã. Etanyi awã kĩ bitomena be, leme basumene a kõ nyina. Foesũ eve obolitsõ onyo a,

X evia ye kĩ, “Odi nye odi akpa bati a bave võe kanyamena loto, loko nte bemoa be biwĩ a, yaboe bakoe a kayamena. Nde foya mo no kõ oko bave võe a oke keyawo loko kĩ?”

XI Yesu kena ye awãwã fotsa fotonyade kĩ ne Kana ne Galilea tite akũ, ekoa enye ye kukũkpale etsa, ade ye fotsa bakolene a te ye bido a.

XII Ke liti a, Yesu mo oma, mo bawaenyole mo ye fotsa bakolene a dzakũ benaa Kapernaum, benadzi ne awã fuwi sukuloo.

Yesu Blomena Koyaato Banyane Ne Baguma Asoli Kola a Kame.

XIII Kĩ Yudafo Wuda Katẽ luwi kanya a wo ɔto liyua a, Yesu naa Yerusalem.

XIV Ne Asoli Kɔla kame a, emɔ kĩ bati dzi banɔ banantsue, baveli mɔ mblɔduma. Emó lɛmɛ kĩ sika babẽnɛ dzi nɛ be tupunu akũ nɛ awã.

XV Foesũ enɔ ɔwẽ ekɛna mple ekɔa eblɔmena bayae a flee, banantsue mɔ baveli a nɛ Asoli Kɔla a kame. Edu be tupunu lɛmɛ ewula, epansam sika babẽnɛ a sika esã.

XVI Ade ebi bikĩ banɔ mblɔduma a kĩ, “Mifla fɔtsa kĩ minemena nɛ awĩ, mitakɔa Nda kɔla mikɛna kɔyaato.”

XVII Ade ke ye fɔtsa bakɔlɛnɛ a te anɛ kĩ Katsɛle Kpalɛwa a lɛ kĩ, “O Baguma, nɔ kɔla akũ mbɔdibɔ atẽ nɛ yĩ kame ndɛ fi aye.”

XVIII Yudafo banɔkɔɛ yavia Yesu kĩ, “Litsa nsentsɛleni aapuli ɔkɛna ɔtsa boe kĩ odeĩ osi kĩ akɛna fukĩ?”

XIX Yesu kpa be mbuaye kĩ, “Miveli Baguma Kɔla kĩ, ade nɛ fuwi elalɛ liti ni, maabuki nke koe.”

XX Yudafo a bi ye kĩ, “Bekɔa futeli tena-avũ bike Asoli Kɔla kĩ, ke mɔ alɛ kĩ aakɔa fuwi elalɛ obuki oke koe a?”

XXI Lɛmɛ asoli kɔla a kĩ Yesu lamɛna kalɛ a nye ye sukɛna.

XXII Foesũ kĩ Baguma dzɛla ye etomɛna kanɔkpa liti a, ye fɔtsa bakɔlɛnɛ a te anɛ kĩ ɛlɛ fukĩ eyi, ade betɛ Katsɛle Kpalɛwa fɔletsɛ mɔ letsɛ a kĩ Yesu lɛ a bido a.

Yesu Nyina Otidziwa Kutitse.

XXIII Kĩ Yesu na nɛ Yerusalem nɛ Wuda Katẽ luwi kanya kame a, bati pii tɛ ye bido nɛ awãwã fɔtsa a kĩ bɛmó kĩ ekɛna a sũ.

XXIV Leme Yesu tákoa ye akū ekpa be, kitonekī enyina bati flee.

XXV Foesū fotásī kī odima abi ye kadi ne bati akū, kitonekī ye mɔawe a enyina letsa a kī lideĩ ne be tɔwɔle kame.

III

Yesu Nye Fɔletsa Kame Etsa Nikodemo.

I Ne loko a naa kame a, Yudafo ɔnokɔẽ mɔa na kī enye Farisini, kī bave Nikodemo.

II Luwi a lenye, eya ne Yesu sekẽ eyabi ye kī, “Fɔtsa ɔtsane, bunyina kī Baguma sekẽ oto ɔya, kitonekī odima eláapuli ekena nsentseleni a kī akena a, nte Baguma lítomo ye.”

III Ade Yesu bi ye kī, “ɔnokɔali mabi no kī nte betábuki belola oti kama ni, eláapuli emɔ Baguma legākanya a.”

IV Nikodemo via ye kī, “Nde baapuli bibuki bema oti kī ebo ane? Eláapuli ewo ne ɔma seme kame belola ye kama leyade.”

V Yesu kpa ye mbuaye kī, “ɔnokɔali a mabi no kī, nte betáma oti bitomena mui mɔ Baguma Hühü kame ni, eláapuli ewo ne ye legākanyakɔ a kame.

VI Sukena kame bama sukena oti katomena, leme Baguma Hühü kame bama hühü ode.

VII Foesū fotakena no wāwā kī nle kī kene kī belola mi flee kama.

VIII ɔwe abɔa kanaa awā kī yawe, anu ye nkā, leme onyina awā kī eto iye awā kī yanaa. Ade aye fɔla fɔkpa odi nye odi kī bema ye ne Hühü a kame a.”

IX Ade Nikodemo via ye kī, “Nde fukī aapuli foya ne foe kame?”

X Yesu kpa ye mbuaye kī, “Fotsa Otsanenokōē ane ne Israel, mō onyina fukī a?”

XI Mabi nō ne onokoli kame kī bōale kodzela ne letsa a kī bunyina a akū, ade bōadi adansie ne letsa a kī bōmō akū a, leme mi kame odima lāwe kī yate boe foletsa a.

XII Nte mbi nō tite akū foletsa mō otáte foe odo a, lōkōa nte mbi nō ode foletsa a ni, aapuli ote foe odo?

XIII Ade odima táde tō enaa ode, mbōente yī, Otidziwa Obi a, kī nto ode ñya a odi.

XIV “Nde ayekī Mose dēla kōe kī bekōa kōoble bekēna a ne otse akū ne kōsa kame a, ade ayea kene kī baadela yī, Otidziwa Obi a, leme ne asendua akū a, **XV** ayekī odi nye odi kī ete yī edo aana nkpā kī ēla kawūna a.

XVI “Kitonekī Baguma ti ewe katinya kale paa kī ekōa ye Obi mōape a ekpa kī odi nye odi kī ete ye edo leláaku ewō, mbom yaana nkpā kī ēla kawūna a.

XVII Kitonekī Baguma tádo ye Obi kī eyaako katinya kame bati kōtō, mbom kī fotsā ye akū bati bēna katē.

XVIII “Odi nye odi kī ete Obi a edo ni, betáko ye kōtō, leme odi nye odi kī etáte edo ni, bekō ye kōtō kōkōe, kitonekī etáte Baguma Obi mōape a edo.

XIX Ayekī badzemō katinya kako bati kōtō a nye kī ohañ a ya ne katinya kame leme bati we otū kale beba ohañ a, kitonekī be fotsakelawa nye tokpa.

XX Odi nye odi kī yakena tokpa akesī ohaī a, ade eláaya ne ohaī a sekē a, kitonekī yaáwe kī yanye ye tokpa kanya.

XXI Leme odi nye odi kī edzi ne onokwali kame ni, yaya ne ohaī a kame ayekī ohaī a aafō bemó kī yakena fotsa ne Baguma kawē akū.”

Yohanes Mui Owolane a Kpale Yesu Akū.

XXII Fukī liti a, Yesu mo ye fotsa bakolene a naa Yudea amantam a kame a. Edzi ne awā fuwi sukuloo ewola bati mui.

XXIII Yohanes leme kawola bati mui ne Aion kī efuā Salim, kitonekī mui bo ne awā. Bati kaya ne ye sekē kī ewola be mui.

XXIV Ne loko a na kame a, betápi tō Yohanes bido ne kola kame.

XXV Luwi a, foletsa kavele ya ne Yohanes fotsa bakolene mo Yudani odi kayite ne Yudafō akū mui kawola amanie akū.

XXVI Foesū beya ne Yohanes sekē beyabi ye kī, “Fotsa Ōtsane, ate ane ne onyole a kī ena ne no sekē ne Yordan owo liti, kī odi adansie ne ye akū a? Elamena bati mui kawola ade bati flee lamena ye sekē kanaa a!”

XXVII Yohanes kpa mbuaye kī, “Odima lelápuli ena litsedi mbente Baguma lekpa ye de.

XXVIII Mi moawe a nye yī adansifo kī nle kī, ‘Nné yī nye Kristo a, mbom Baguma do yī kī ĩnya ye loto.’

XXIX Obolitsō onyo nye oti a kī ela obolitsō a, leme obolitsō onyo okoba kī edzē ne owē yatse a kō, kawole ade ye pii nte enu obolitsō onyo a odo. Ade ayea kī nnu ye odo a, yī kawolekamo akpola a.

XXX Kενε κῖ ye dī lide ne ode lokoa yī lide leka ne kayo.

Oti a Kī Eto Ode Eya a Bē Be Flee.

XXXI “Oti a κῖ eto ode eya a bē be flee. Oti a κῖ eto tite akū a nye tite akū oti, ade tite akū foletsa yale a, leme oti a κῖ eto ode a bē be flee.

XXXII Yale letsa a κῖ εμό, mo letsa a κῖ enu, leme odima látε ye adansie kadi a.

XXXIII Leme odi nye odi κῖ ετε ye foletsa a, asipi κῖ Baguma adi onokali.

XXXIV Oti a κῖ Baguma do a ale Baguma foletsa, kitonekī Baguma koa Hūhū eyula ye kame.

XXXV Olega a awe ye Obi kale, ade foesū ekoa fotsa flee edo ne ye awe a.

XXXVI “Odi nye odi κῖ ετε Obi a edo ni, edeñ nkpā κῖ elá kawūna a, odi nye odi κῖ yaátse Obi a ni, elána nkpā, mbom Baguma kalokpa aana ne ye akū.”

IV

Yesu Mo Samaria Otsolo Odi Lomena.

I Farisifo a nu κῖ Yesu kawola bati mui, κῖ ye fotsa bakolene a kapo kaba Yohanes bade.

II Leme ne onokali kame ni, Yesu moawe táwola odima mui, mbom ye fotsa bakolene a odi lewola bati mui.

III Foesū κῖ Yesu nu foletsa κῖ a, edzakū ne Yudea emuniki enaa Galilea tite akū.

IV Kενε κῖ etsā Samaria tite kame enaa awā.

V Yesu yawo Samaria omato odi κῖ bave Sikar. Omato a fuā mo tite a κῖ be owanyo Yakob koa ekpa ye obi Yosef.

VI Yakob lɔwɔke deĩ ne awã. Yesu yawo awã nde suwa tɔdɔũ ewua-nviã kame, ade kĩ osi katsã piã ye sũ ni, ekena akũ edzi ne lɔwɔke a ɔwẽ.

VII Owi tábuna mɔ Samaria otsole odi ya kĩ yaanu mui. Yesu bi ye kĩ, “Kpa yĩ mui badi mmoa.”

VIII Ne lɔko a na kame ni, ye fɔtsa bakolene a naa ɔmato kame benaaya funitsã.

IX Otsole a bi Yesu kĩ, “Nde fɔya mɔ no Yudani avia yĩ Samaria otsole kĩ nkpa no mui kamɔa?” Ele lomo kitonekĩ Yudafɔ mɔ Samariafɔ lákã.

X Yesu kpa ye mbuaye kĩ, “Nte kanyina onyina letsa a kĩ Baguma akpa, mɔ oti a kĩ ye lamena no mui mɔawa kavia ni, kufe no aavia ye lɔkoɔ ekpa no mui kĩ bakpa nkpã a.”

XI Otsole a bi ye kĩ, “Ɔnɔkɔẽ, ɔnéɛ bokiti kĩ bakɔa kanu mui, ade lɔwɔke a leme dzũ a. Ndia aatomena mui a kĩ bakpa nkpã a?”

XII Boe ɔwanyɔ Yakob lenye lɔwɔke kũ ekpa boe, ade ye mɔawe, ye babi mɔ ye bayae flee mɔa mui bitomena de kame a. Mbɔɛɛ katsa atsa kĩ ɔbẽ Yakob?”

XIII Ade Yesu kpa ye mbuaye kĩ, “Odi nye odi kĩ emɔa mui kũ ni, ɔmɔado aabuki ekɔ ye,

XIV leme odi nye odi kĩ yamɔa mui a kĩ maakpa ye a ni, ɔmɔado leláabuki ekɔ ye da. Kitonekĩ mui a kĩ maakpa oti a aadani mui katokɔ kĩ nkpã mui deĩ a ne ye kame, bekpa ye nkpã kĩ ela kawũna a.”

XV Otsole a bi Yesu kĩ, “Ɔnɔkɔẽ, kpa yĩ mui a na badi ayekĩ ɔmɔado leláabuki ekɔ yĩ da, ñye mbuki ñya ne awĩ kĩ maanu mui.”

XVI Ade Yesu bi ye kĩ, “Naakpã no ɔnyɔ miya.”

XXVII Otsole a bi ye kī, “Nlá onyɔ.”

Yesu bi ye kī, “Ɖɛ onɔkɔali kī ɔlá onyɔ.

XXVIII Nɛ onɔkɔali kame ni, odzimɔ banyole elo tɔ̃, ade onyole a kī mimɔ ye midzi finyaakĩ malo liti enyé nɔ onyɔ a.”

XXIX Ade otsole a bi Yesu kī, “Ɖnɔkɔẽ, mmó kī Baguma onukpẽ onyene anɛ.

XX Boe Samariafɔ bawanyɔ sum Baguma nɛ ɔto kĩ akū, lemɛ mi Yudafɔ mibo Yerusalem nye awā kī kenɛ kī bati bisum Baguma.”

XXI Yesu bi ye kī, “Boe ɔma, tɛ yĩ kado kī lɔkɔ aaya kī bati leláabuki bisum Ɖɛga a nɛ ɔto kĩ akū ãye nɛ Yerusalem.

XXII Mi Samariafɔ miti minyina oti a kī ye miasum. Lemɛ boe Yudafɔ kɔ bunyina oti a kī boasum, kitonɛkī Yudafɔ akū nkpā kate a tsā keya.

XXIII Lemɛ lɔkɔ aya, ade leya kɔkɔɛ malo kī bati a kī basum Baguma nɛ osi wĩ akū a, aasum Ɖɛga a nɛ Baguma Hũhũ mɔ onɔkɔali kame. Ade bati a kī basum ye lomɔ a Baguma awɛ a.

XXIV Baguma ni, Hũhũ yanɛ, foesũ kenɛ kī bati a kī basum ye a, bisum ye nɛ Hũhũ mɔ onɔkɔali kame.”

XXV Ade otsole a bi ye kī, “Ĩnyina kī Mesia kī bave Kristo a aaya, ade nte eya ni, yaabi boe letsa nye letsa.”

XXVI Yesu bi ye kī, “Yĩ nye ye, yĩ a kī nlamena kɔdzela kale mɔ nɔ a.”

XXVII Lɔkɔ a na kame mɔ Yesu fɔtsa bakɔlenɛ a muniki beya. Fɔkena be wāwā paa kī bemó kī ye mɔ otsole belamena kɔdzela kale. Lemɛ be kame

odima távia otsole a kī, “Litsa awe?” ĩye bivia Yesu kī, “Nde sū mimo ye mialomena?”

XXVIII Ade otsole a fone ye kugumi awe eyi ne awā, enaa omato kame enabi bati kī,

XXIX “Miyaadā onyole odi kī ebi yī letsa nye letsa kī nkena tō. Mboue ye nye Kristo a?”

XXX Foesū bati né ne omato a kame benaa Yesu sekē.

XXXI Ne loko a kame a, Yesu fotsa bakolene a kake ye aduli kī, “Fotsa Ōtsane, yaanya litsedi.”

XXXII Leme Yesu bi be kī, “Ndeĩ funitsā kī maanya, kī minyina foe akū letsama.”

XXXIII Foesū ye fotsa bakolene a kavia be akū kī, “Mboue odi ma ye funitsā?”

XXXIV Yesu bi be kī, “Yī funitsā nye kī makena ne oti a kī edo yī a kawe akū, loko nwūna ye adzuma a kī ekpa yī a.

XXXV Nné mi ale kī kite tideto ena soū kī funitsā karkota loko awo oto? Leme mabi mi kī miko ane midā foba a! Funitsā a bo kī karkota.

XXXVI Oti a kī yakpota funitsā a ate kotokase, ade okpotane akpota foe kakpa nkpā kī elá kawūna a. Foesū funitsā odune a mo okpotane a flee aamo kawole bekpota.

XXXVII Foesū kale a kī bale kī, ‘Oti moa adu fotsa, oti bebā akpota foe’ a nye onokoli.

XXXVIII Ndo mi kī minaakpota funitsā ne foba a kī mitakena adzuma ne foe kame a. Bati bebā lekena adzuma ne awā, leme mi mina nfaso mitomena be adzuma kakena kame.”

Samariafo Pii Te Yesu Bido.

XXXIX Samariafo pii kī bito omato a kame a te Yesu bido ne otsole a adansiē a kī edi kī, “Ebi yī

letsa nye letsa a kǐ nkɛna tǔ nɛ yǐ nkpǎ kame,” a sũ.

XL Foesũ kǐ beyamɔ Yesu a, bike ye aduli kǐ edzi nɛ be sɛkɛ, ade Yesu dzi nɛ awã fuwi nviã fudi a.

XLI Bati bebã pii lemɛ tɛ Yesu bido nɛ ye mɔawɛ fɔletsɛ a kǐ ɛɛ a sũ.

XLII Ade bibi otsole a kǐ, “Finyaa kɔ, nné nɔ fɔletsɛ a sũ botɛ budo, kitonɛkǐ boe mɔawɛ a bunu fɔletsɛ a kǐ ɛɛ a, ade bunyi kǐ nɛ onɔkɔali kame ni, ye nye katinya kame Ɔtɛnɛ a.”

Yesu Tsá Onkɔɛ Odi Obinyole.

XLIII Nɛ fuwi nviã a liti a, Yesu dzakũ nɛ awã enaa Galilea tite akũ.

XLIV Ye mɔawɛ a ɛɛ kǐ, “Baguma onukpɛ onyɛnɛ léla obu nɛ ye mɔawɛ kade bati kame.”

XLV Lemɛ kǐ ewo Galilea tite akũ a, bati a tɛ ye katɛ wĩ, kitonɛkǐ benaa Yerusalem nɛ Wuda Katɛ Luwi kanya a kame, ade bɛmó letsɛ nye letsɛ a kǐ ɛkɛna a nɛ luwi kanya a kame.

XLVI Ke liti a, Yesu muniki enaa Kana nɛ Galilea tite akũ, awã kǐ ɛdani mui bɛkɛna bavɛ a. Abãã onkɔɛ odi deĩ nɛ awã, ye obinyole aso nɛ Kapernaum.

XLVII Kǐ enu kǐ Yesu to Yudea ɛya nɛ Galilea a, enaa ye sɛkɛ ɛnake ye aduli kǐ ɛyatsɛ ye obi kǐ edeĩ nɛ wuda mɔ nkpǎ kayite a ɛkpa ye.

XLVIII Yesu bi ye kǐ, “Ntɛ mitámɔ awãwã mɔ nsentsɛleni fɔtsɛ ni, miáɛ kado.”

XLIX Onkɔɛ a ke ye aduli kǐ, “Boe Ɔlate, ntɛ ɔtáya mɔatɛ ni, yǐ obi aaku.”

L Ade Yesu bi ye kǐ, “Naa, nɔ obi aana nkpǎ.”
Onkɔɛ a tɛ Yesu fɔletsɛ a edo ade epi ɔtosi a.

LI Kĩ yanaa a, ye basumune yatselamo ye bibi ye kĩ ye obinyole a sae.

LII Evia be loko a kĩ de kame obinyole a sae, ade bibi ye kĩ, “Kadzɔ suwa ɔdoũ moa kame mo atilili a fone ye awe.”

LIII Ade ɔlega a te ane kĩ ade loko a na kame pɛpɛɛɛ Yesu bi ye kĩ, “No obi aana nkpã.” Ne foesũ ye mo ye toto kame bati flee te Yesu bido.

LIV Ade fukĩ nye nsentseleni ayade kĩ Yesu kena ne Galilea, kĩ emuniki eto Yudea eya a.

V

Yesu Tsá Abafã Adi Ne Betesda Lutubu Abuĩ.

I Ke liti a, kĩ Yudafɔ luwi lidi kanya wo ɔto a, Yesu muniki enaa Yerusalem.

II Lutubu lidi deĩ ne Yerusalem kako a kĩ bave Baveli Onyukpẽ a ɔwẽ, kĩ bave ne Hebri tide kame kĩ Betesda. Bike tɛpata elo ne de ato.

III Basone beblebee awa ne tɛpata a kame, be badi nye banekune, babebã nye lekpeẽ banene mo abafã ame. Bawa ne awã kadzɔle kĩ beyaakputua mui a.

IV (Kitonekĩ nte kideĩ kideĩ Baguma ode fɔto ɔnyane odi ato ode kayaakputua mui a. Ɔsone ɔtonyade kĩ yawo ne mui a kame ne be kakputua liti a, asae ne fɔso nye fɔso kĩ yaso a kame.)

V Onyole odi kĩ ekaso futeli taale-alẽ flee na ne awã.

VI Kĩ Yesu mó ye kĩ ewaa ne awã a, enyi kĩ ekaso owi buna, foesũ evia ye kĩ, “Awe kĩ asae?”

VII Ɔsone a kpa mbuaye kĩ, “Ɔnokɔẽ, nte bikputua mui a ni, nlá odima kĩ yabɔe yĩ enaado

ne lutubu a kame. Nte mboa mbodi ñyidza manaa a, lokoa oti bebã tẽ enya yĩ loto.”

VIII Yesu bi ye kĩ, “Yidza kadza, kabœ no okena katsã!”

IX Letaleta osone a na akũ osĩ, ebœ ye okena edo katsã awe.

Luwi a kĩ fukĩ ya a nye Yudafõ Kaweya Luwi,

X foesũ Yudafõ banokõẽ a bi oti a kĩ Yesu tsa a kĩ enone ye okena a kĩ, “Nviã nye Kaweya Luwi. Boe mbla a tãkpa osi kĩ alo no okena.”

XI Onyole a kpa be mbuaye kĩ, “Oti a kĩ etsa yĩ a libi yĩ kĩ, ‘Yidza kadza, kabœ no okena katsã!’”

XII Ade ke bivia ye kĩ, “Owei nye oti a kĩ ebi no kĩ bœ no okena katsã?”

XIII Leme oti a kĩ betsa a linyina Yesu, kitonekĩ bati yi awã, ade Yesu leme vele akũ ene ne bati a kame a.

XIV Ke liti a, Yesu mó ye ne Asoli Kola a kame ade ebi ye kĩ, “Dã! Finyaa ona akũ osĩ, foesũ fõ tokpa kakena, nte nné aye ni, letsa kpa bebã kĩ lebẽ fukĩ aaya ne no akũ.”

XV Ade ke onyole a dzakũ enabi Yudafõ banokõẽ a kĩ Yesu letsa ye.

XVI Foesũ bido Yesu liti katomena awe, kitonekĩ etsa oti ne Kaweya Luwi akũ.

XVII Leme Yesu bi be kĩ, “Nda akena adzuma luwi nye luwi, ade yĩ malo kene kĩ nkena adzuma a.”

XVIII Foletsa kũ fõ Yudafõ banokõẽ a buki bewe mo osĩ mo osĩ kĩ bako Yesu, kitonekĩ nné Kaweya Luwi mbla a odi efum, mbom ebuki ele kĩ Baguma nye Olaga, kĩ foatsa kĩ ekoa ye akũ eketimo Baguma.

Baguma Kpa Obi Kòbě.

XXIX Foesũ Yesu bi be kī, “Mabi mi ne ɔnɔkɔali kame kī Obi a lɛlɛapuli ɛkena letsama ne ye mɔawe akũ. Letsa a kī Obi a amɔ kī ɔlega akena a, ade de odi ye malo yakena a.

XX Kitonekī ɔlega a awe Obi a kale, ade yatsa ye letsa nye letsa kī ye mɔawe yakena a. Yaatsa Obi fɔtsa kpale kolaa kī fɔbě fukī kī ɛkena, kī fɔakena mi wāwā.

XXI Nde ayekī ɔlega a adzela banɔkpa badzi nkpā a, ade aye Obi a lɛme aakpa bikī epau a nkpā a.

XXII ɔlega mɔawe a lɛdzemɔ odima, mbom ɛkɔa kòbě flee edo ne Obi a awe kī ɛdzemɔ bati flee,

XXIII ayekī be flee baakɔa obu bekpa Obi a nde ayekī bakɔa kakpa ɔlega a. Odi nye odi kī yaábu Obi a ni, yaábu ɔlega a kī ye lido ye a lɛme.

XXIV “Mabi mi ne ɔnɔkɔali kame kī odi nye odi kī yatse yī fɔletsa, mɔ yatɛ oti a kī edo yī a kado ni, edeĩ nkpā kī ɛlɛ kawũna a. Beláadzemɔ ye, mbom etsā wuda kame ɛtě, ɛna nkpā kòkɔɛ.

XXV Mabi mi ne ɔnɔkɔali kame kī lɔkɔ lidi aya, ade leya kòkɔɛ malo, kī banɔkpa aanu Baguma Obi a odo, ade bikī binu ye odo a aadzi nkpā a.

XXVI Nde ayekī ɔlega a mɔawe kame nkpā deĩ a, ade ayea ɛfɔ nkpā deĩ ne Obi a lɛme kame a.

XXVII ɛkpa ye kòbě kī ɛdze ɛkɔ kɔto lɛme, kitonekī ye nye Otidziwa Obi a.

XXVIII “Fukī fɔtakena mi wāwā, kitonekī lɔkɔ lidi aya kī banɔkpa flee aanu ye odo,

XXIX lɔkɔa baane ne be funike kame. Bikī bekena tuwī a aayidza bidzi nkpā, ade bikī bekena tɔkpa a aayidza bekpa kɔtɔkaku.”

Bati a Kī Bidi Adansie Ne Yesu Akū.

XXX Yesu buki ele kī, “Nlápuli nkena letsama ne yī mōawe otumi akū. Madze fōletsa nde ayekī Baguma abi yī, foesū madze ne osi kpī akū, kitonekī maákēna ne yī mōawe kawē akū, mbom makēna ne oti a kī edo yī a kawē akū.

XXXI “Nte ndi adansie ne yī mōawe akū ni, yī adansie a tákpola.

XXXII Leme oti bebā deī kī yadi adansie ne yī akū, ade ñnyina kī letsa a kī yale ne yī akū a kpola.

XXXIII “Mido batō ne Yohanes sekē, ade ebi mi onokōali ne yī akū a.

XXXIV Ntásī otidziwa adansie kadi ne yī akū, mbom nle fukī ayekī míana nkpā katē.

XXXV Yohanes la nde osedza kī yatē kakpale fōkō, ade miawe kī miamō kawōle sukuloo ne ye ohaī a kame a.

XXXVI “Leme ndeī adansie kī ebē Yohanes ade a. Fōtsa a kī makēna a kī fonye tudzuma kī Nda kpa yī kī nkena nwūna a, ade foe adi adansie ne yī akū, katsa leme kī Ōlega a lido yī a.

XXXVII Ōlega a kī edo yī a, ade ye adi adansie ne yī akū a. Mitánu tō ye odo ñye mimó tō ayekī ela a.

XXXVIII Mitáte ye fōletsa a ne mi tōwōle kame, kitonekī mitáte oti a kī edo a mido.

XXXIX Miatsā Katsēle Kpalēwa a fōletsa kame fininiini, kitonekī miakōna kī foe kame míatsā mina nkpā kī elá kawūna a. Ade ovoli kī kame fōletsa mōape a adi adansie ne yī akū a,

XL leme miáwe kī miaya ne yī sekē ayekī míana nkpā.

XLI “Maáwe kamu ntomena batidziwa sekē,

XLII kitonekĩ ñnyina bati a odu kĩ be miane, ade ñnyina lemε kĩ milá ɔɔo mikpa Baguma ne mi towɔle kame a.

XLIII Ñya ne Nda dĩ akũ lemε mitáte yĩ. Lemε nte oti bebã leya ne ye moawe dĩ akũ ni, miáte ye.

XLIV Miawe kĩ miáte mi akũ akũ kamu, lemε miáwe kamu a kĩ kito oti a kĩ ye odi nye Baguma a sekẽ, lokɔa nde miapuli mite yĩ mido?

XLV “Lemε mitakɔna kĩ yĩ aatsua mi onukpẽ nkpa Nda. Mose a kĩ ye akũ mikɔa ane mite a, ade ye nye oti kĩ yaatsua mi onukpẽ a.

XLVI Nte miti mite Mose mido ni, kufe miáte yĩ malo mido, kitonekĩ etselε fɔletsa eyi ne yĩ akũ.

XLVII Lemε nte mitáte fɔletsa a kĩ etselε eyi a mido ni, nde miákɛna mite yĩ fɔletsa a mido?”

VI

Yesu Kpa Bati Mpim Elo Funitsã Benya.

I Ke liti a, Yesu nyina Galilea ɔwo lutubu baũ a kĩ have lemε kĩ Tiberia ɔwo lutubu baũ a, enaa sekε sitide a.

II Bati kodabu kpale tomo ye kitonekĩ bemó awãwã fɔtsa a kĩ ekɛna, ne basɔne katsa kame a.

III Ade Yesu de enaa ɔto akũ enakɛna akũ edzi mo ye fɔtsa bakɔlenε.

IV Finyaa, Wuda Katẽ Luwi kanya lokɔ a wo ɔto liyua.

V Kĩ Yesu dzela ane edã fokɔ a, emó kĩ bati kodabu baũ kudi lamɛna ye sekẽ kaya, foesũ evia Filipino kĩ, “Ndia bóana funitsã boya bokpa bati kĩĩ flee?”

VI Yesu moawe nyina letsa a kī yaakena, leme evia Filipo kale kī kī yaso ye edā.

VII Ade Filipo kpa ye mbuaye kī, “Nte boya funitsā sika ovoe oha nviā malo ni, foláawī be nte odi nye odi te sukuloo sukuloo malo.”

VIII Awā naa, Yesu fotsa bakolene a kame omoa, Andrea, kī enye Simon Petro owaē bi ye kī,

IX “Opopo odi nē abodoo fobo elo mo kofabi nviā nē awī. Leme futi foláato bati beblebee kī?”

X Yesu bi be kī, “Mifō bati a flee bekena akū bidzi.” Tuwī bloblo deī nē awā ade bati a flee kēna akū bidzi nē te akū a. Banyole a lidede aana nde mpim elo.

XI Ade ke Yesu te abodoo a enye Baguma kole, ade esē ye ekpa bati a. Ekēna kofabi a leme lomo, ade be flee bēna funitsā nde ayekī bawe a.

XII Kī benya biwī a, Yesu bi ye fotsa bakolene a kī, “Mikpota fukī fute a. Mitafō bubula fudima kade.”

XIII Foesū bifila fukī bati a nya bitina nē abodoo elo a kame a biyula tetsetse ewua-nviā.

XIV Kī bati a mó awāwā fotsa a kī Yesu kēna nē awā a, bele kī, “Onokoli, ade Baguma onukpē onyene a kī yaya nē katinya kame a!”

XV Kī Yesu mó kī baayatimtim ye bipi bidzina legā a, foesū ené nē be kame ebuki ede enaa oto akū ye odi.

Yesu Tsā Mui Anē.

XVI Kī olobe loko wo oto a, Yesu fotsa bakolene a ka bēnaa owo lutubu baū a abuī.

XVII Biwo ne ɔkɔlɔ kame bimuniki binyina banaa Kapernaum. Ne lɔkɔ a, kade dɔ lɛmɛ Yesu táyawo tɔ be sekẽ.

XVIII Ne lɔkɔ a na kame a, ɔwɛ kpale odi kavũ mɔ ɔsĩ mɔ ɔsĩ kabɔa mui kadɛla kakamɛna.

XIX Kĩ fɔtsa bakɔlɛnɛ a tá ɔkɔlɔ a banaa lɔtɔ ndɛ fusikũ ɛlale ãye foe ɛna a, bɛmó Yesu kĩ ɛtsɛ mui anɛ yaya ne ɔkɔlɔ a sekẽ, ade libe wo be a.

XX Lɛmɛ Yesu bi be kĩ, “Mitavila. Yĩ manɛ!”

XXI Ɔwɔlɛ ka edzi be ade bɛfɔ Yesu wo ne ɔkɔlɔ a kame a. Lɛtaletá ɔkɔlɔ a wo lowɔtuni ne awã kĩ banaa a.

Bati a Tsã Bɛwɛ Yesu.

XXII Kĩ kade nyina a, bati kɔdabu a kĩ bɛkahɔ ne ɔwɔ lutuni litide kadzɔ a mó biyi ɔsũ kĩ ɔkɔlɔ mɔapɛ lɛna ne awã. Bɛmó lɛmɛ kĩ Yesu táwo ne ɔkɔlɔ a kame ebumɔ ye fɔtsa bakɔlɛnɛ a, mbom bɛdzakũ bɛfɔnɛ ye.

XXIII Lɔkɔ a na kame a, tɔkɔlɔ bɛbã tidi kĩ tito Tiberia ɔmato a yadza tifuã awã kĩ bati nya abodoo a kĩ boe Ɔlate bɔa mpɛ ne ye akũ a.

XXIV Kĩ bati kɔdabu a mó kĩ Yesu ãye ye fɔtsa bakɔlɛnɛ a kame odima lɛlãa awã a, biwo ne tɔkɔlɔ a kame bɛnaa Kapernaum bɛnaawɛ ye.

Yesu Nyé Nkpã Abodoo a.

XXV Kĩ bati a mó Yesu ne lowɔtuni litide a ni, bivia ye kĩ, “Fɔtsa Ɔtsanɛ, lɔkɔ lowɔdabe ɔyawo awĩ?”

XXVI Yesu kpa be mbuayɛ kĩ, “Mabi mi ne ɔnɔkɔali kame kĩ, nné awãwã fɔtsa a kĩ nkɛna mimó a sũ mitsẽ miawɛ yĩ, mbom abodoo a kĩ mina minya miwĩ a sũ.

XXVII Mitaha akū ne funitsā kī f́óabu kade akū, mbom miha akū miwe funitsā a kī f́óawa f́okpa daa nkpā a kī Otidziwa Obi a aakpa mi a, kitonekī ade ye akū Baguma boe ɔlega a te awe a.”

XXVIII Foesū bati a via Yesu kī, “Litsa kenε kī b́okena f́otsa kī b́oakena Baguma adzuma?”

XXIX Yesu kpa be mbuaye kī, “Letsa a kī Baguma awe kī mikena nye kī mite oti a kī edo a mido.”

XXX Ade bivia ye kī, “Nsentseleni awɔdabe aakena b́omó lokɔa b́ote nɔ budo? Litsa aakena?”

XXXI Boe bawanyɔ nya funitsā a kī bave mana a ne kɔsa kame nde ayekī bele ne Katsɛle Kpalɛwa a kame kī, ‘Ekpa be abodoo etomena ode kī benya.’ ”

XXXII Yesu bi be kī, “Ɔnɔkɔali a mabi mi kī, nné Mose lekpa mi abodoo a etomena ode, mbom Nda akpa abodoo wī katomena ode.

XXXIII Kitonekī Baguma abodoo a nyé oti a kī eto ode eya kī yakpa katinya nkpā.”

XXXIV Ade bibi ye kī, “Boe ɔlate, kpa boe abodoo kī daa.”

XXXV Yesu bi be kī, “Yī nye abodoo a kī yakpa nkpā. Odi nye odi kī eya ne yī sekē ni, kɔle leláako ye da, ade odi nye odi kī ete yī edo ni, ɔmɔado leláako ye da.

XXXVI Finyaa mbi mi kī, mimó yī, leme miáte mido.

XXXVII Odi nye odi kī Nda kɔa ekpa yī ni, yaaya ne yī sekē, ade odi nye odi kī eya ne yī sekē ni, nláablɔmena ye da,

XXXVIII kitonekī nto ode ñya, nné kī mayaakena ne yī mɔawe kawε akū, mbom kī makena oti a kī edo yī a odi kawε akū.

XXXIX Ade oti a kī edo yī a kawε nye kī bati a kī εκθα εκπα yī a kame odima etayela, mbom kī ndzela be flee bidzi nkpā ne luwi nkaε a akū.

XL Kitonekī Nda kawε nye kī odi nye odi kī εμό Obi a mo ετε ye edo lemε ni, εna nkpā kī ελά kawūna a. Ade maadzela ye edzi nkpā ne luwi nkaε a akū a.”

XLI Yudafō a do hūhūhūhū kakena awε ne Yesu akū, kitonekī ελε kī, “Yī nye abodoo a kī eto ode εya a.”

XLII Foesū bele kī, “Nné Yesu, Yosef obinyole a kī bunyina ɔlega mo ɔma flee a ne awī a? Nde fɔya mo finyaa yale kī ode eto εya?”

XLIII Ade Yesu kpa be mbuaye kī, “Mifō hūhūhūhū kakena ne mi kame.

XLIV Odima lelāapuli εya ne yī sekē mbɔente Nda a kī edo yī a vele ye εma yī, ade maadzela ye edzi nkpā ne luwi nkaε a akū a.

XLV Baguma onukpē banyene a tsele biyi kī, ‘Baguma aatsa bati flee fɔtsa!’ Odi nye odi kī etse ɔlega a, εκθλε fɔtsa etomena ye sekē ni, aya ne yī sekē.

XLVI Lemε fukī lātsa kī odi mó tō ɔlega a, mbɔente oti a kī eto Baguma sekē a odi lemō ɔlega a.

XLVII Mabi mi ne ɔnɔkɔali kame kī odi nye odi kī ετε edo ni, edeī nkpā kī ελά kawūna a.

XLVIII Yī nye abodoo a kī yakpa nkpā.

XLIX Mi bawanyɔ nya mana ne kɔsa kame, lemε biku.

^L Lemε abodoo a kī eto ode εya a aafō odi nye odi kī yanya ye a lelāaku.

LI Yī nyε abodoo a kī yakpa nkpā, kī eto ode εya a. Nte odi nya abodoo kī ni, yaadzi nkpā daa, ade ke abodoo a kī maakpa ye a nyε yī sukena, kī makpa katinya kame bati bena nkpā.”

LII Fukī fō Yudafō a yi fōletsa kavεε kayo nε kalokpa kame nε be kame ade bivia kī, “Nde oti kī aapuli ekōa ye sukena ekpa boe kī boba?”

LIII Ade Yesu bi be kī, “Mabi mi nε onokoli kame kī nte mitāba Otidziwa Obi a sukena, mimōa ye baboanε a ni, milāana nkpā nε mi kame.

LIV Odi nyε odi kī εba yī sukena εmōa yī baboanε lemε ni, yaana daa nkpā a, ade maadzela ye edzi nkpā nε luwi nkaε a akū a.

LV Kitonekī yī sukena nyε funitsā wī a, ade yī baboanε lemε nyε bave wī a.

LVI Odi nyε odi kī yaba yī sukena, kī yamōa yī baboanε lemε ni, edeī nε yī kame ade yī malo ndeī nε ye kame a.

LVII Nde ayekī Ōlega a kī edzi nkpā do yī a, kī ndzi nkpā nε ye sū a, ade ayea odi nyε odi kī εba yī sukena lemε aadzi nkpā nε yī sū a.

LVIII Ade abodoo a kī eto ode a nε awī a. Elá ndε mana a kī mi bawanyo nya lemε ke liti, biku a. Odi nyε odi kī enya abodoo kī aadzi nkpā daa.”

LIX Yesu le fukī nε lokō a kī ekatsa fōtsa nε Yudafō katsenakō nε Kapernaum.

Yesu Tsa Fōtsa Nε Daa Nkpā a Akū.

LX Yesu fōtsa bakolene a pii nu fōletsa kī ade bele kī, “Fōtsa katsa kī tené osī! Owei aapuli ete foe?”

LXI Yesu mó eyi ɔsũ kī bekakena hũhũhũhũ, foesũ ebi be kī, “Mbɔɛɛ fukĩ fĩ miawɛ kī miakpa lolɔ?”

LXII Kekõ nde fɔana nte mimó Otidziwa Obi a kī emuniki ede yanaa ode, awã kī ena tõ a?

LXIII Baguma Hũhũ a akpa nkpã, otidziwa kɔbẽ leláa letsama kame. Fɔletsa a kī mbi mi a nye Hũhũ kame fɔletsa kī foe kame nkpã deĩ.

LXIV Lemɛ mi kame badi tátɛ bido.” Kitonekĩ Yesu nyi kito anɛ kayɔkayi a bati a kī beláatɛ bido mo oti a kī ye aanyɛ ye ɛkpa a.

LXV Elɛ ebu kī, “Ade fukĩ sũ mbi mi kī odima leláapuli eya nɛ yĩ sekẽ mbɔentɛ ɔlɛga a kpa ye osi.”

LXVI Kito fukĩ akũ a, Yesu fɔtsa bakolɛnɛ a badi pii muniki nɛ ye liti, ade betábuki bitomo ye a.

LXVII Foesũ evia fɔtsa bakolɛnɛ ewua-nviã a kī, “Mi malo miawɛ kī miadzakũ mbɔɛɛ?”

LXVIII Ade Simon Petro kpa ye mbuayɛ kī, “Boe ɔlate, owei sekẽ bóadzakũ bɔnaa? Nɔ deĩ daa nkpã a fɔletsa.

LXIX Finyaa kõ bɔtɛ budo ade bunyina kī no nye Oti Kpalɛwa a kī eto Baguma sekẽ a.”

LXX Ade ke Yesu kpa mbuayɛ kī, “Nné mi bati ewua-nviã mpau? Lemɛ mi kame ɔmoa nye Abonsam!”

LXXI Yuda, Simon Iskariot obi a akũ fɔletsa ɛkale, kitonekĩ tito kī enyɛ be ewua-nviã a kame ɔmoa malo ni, ade ye aanyɛ ye ɛkpa a.

VII

Yesu Mo Bawaẽ.

^I Ke liti a, Yesu natsã emini ne Galilea tite akũ, ετάωε kĩ yamini ne Yudea tite kame, kitonekĩ Yudafɔ banɔkɔẽ ne awã kawε kĩ bakɔ ye.

^{II} Ne lɔkɔ a na kame a, Yudafɔ Tεpatampa Kayɔ Kadzi Luwi kanya a fuã,

^{III} foesũ Yesu bawaẽnyole bi ye kĩ, “Dzakũ ne awĩ kanaa Yudea tite akũ, lɔkɔa nɔ fɔtsa bakɔlene a lemε bemɔ adzuma a kĩ olamena kakena a.

^{IV} Odima lákɔla ye adzuma nte yawε kĩ bati binyi ye kanyi wĩ. Nte nuwĩ olamena fɔtsa kĩĩ bame flee kakena ni, nye nɔ akũ katsa katinya kame bati flee!”

^V Yesu bawaẽnyole a le fukĩĩ kitonekĩ be malo betáte ye bido.

^{VI} Ade Yesu bi be kĩ, “Yĩ lɔkɔ wĩ táwo tɔ ɔtɔ, lemε mi kɔ lɔkɔ nye lɔkɔ nenε lekpa mi.

^{VII} Katinya kame bati lelápuli bikesĩ mi, lemε yĩ kɔ bakesĩ yĩ, kitonekĩ ndzemɔ be kabi kĩ be tudzuma nye tokpa.

^{VIII} Minaa luwi a kanyakɔ. Yĩ kɔ nláanaa luwi kĩĩ kanyakɔ, kitonekĩ yĩ lɔkɔ wĩ táwo tɔ ɔtɔ.”

^{IX} Kĩ Yesu le fukĩĩ eyua a, ebuki ekahɔ ne Galilea.

Yesu Naa Tεpatampa Kayɔ Kadzi Luwi Kanyakɔ.

^X Kĩ Yesu bawaẽnyole a dzakũ benaa luwi kanyakɔ a, ye malo εyanaa awã, lemε εtányε ye akũ etsa, mbom ebela ye akũ.

^{XI} Yudafɔ banɔkɔẽ a kawε ye ne luwi a kanyakɔ, bekavia kĩ, “Nde oti a?”

^{XII} Bati kɔdabu a kale kɔdzela pεtεε pεtεε ne Yesu akũ. Be kame badi le kĩ, “Oti wĩ yanε.”

Ade babebã lɛmɛ lɛ kī, “Oowo, etsẽ yake bati.”

XIII Lɛmɛ odima tãpuli ɛlɛ foe kɔɔba, kitonekī bivila Yudafo banɔkɔẽ a.

XIV Kī kite sukuloo luwi kanya a atẽ de kayite a, Yesu naa Baguma Asoli Kɔla a kame enado bati fɔtsa katsa awɛ.

XV Ye fɔtsa katsa a kena Yudafo banɔkɔẽ a wãwã paa, ade beɛ kī, “Nde oti kīĩ kena enyina ovoli lomɔ, kī etána fɔtsa kakɔlɛ kadima?”

XVI Yesu kpa be mbuaye kī, “Fɔtsa a kī matsa a lenyé yĩ mɔawe fude, mbom futo Baguma kī edo yĩ a sɛkẽ.

XVII Odi nye odi kī yawɛ kī yakena nɛ lɛtsa a kī Baguma awɛ akū a, aanyi nte fɔtsa a kī matsa a to Baguma sɛkẽ iye malɛ foe nɛ yĩ mɔawe kɔbẽ akū.

XVIII Oti kī yatsa fɔtsa nɛ ye mɔawe kɔbẽ akū ni, obu yawɛ ɛkpa ye akū. Lɛmɛ nte oti awɛ obu ɛkpa oti a kī edo ye a ni, enye ɔnɔkɔalini, ade tokpa tidima lɛláa ye kame a.

XIX Mbɔɛɛ nné Mose lɛkpa mi mbla a? Lɛmɛ mi kame odima lákɛna nɛ mbla a akū. Nde sũ miawe kī miako yĩ?”

XX Ade bati kɔdabu a bi ye kī, “Hũhũ kpa deĩ nɛ nɔ kame! Owei awɛ kī yako nɔ?”

XXI Yesu kpa be mbuaye kī, “Awãwã fɔtsa mɔa kīĩ nkɛna, ade mi flee mikɛna saa a.

XXII Mose kpa mi mbla kī mitsua mi babinyole fɔkpati, ade tito kī nné Mose sɛkẽ futo, mbom mi bawanyɔ liyi foe kayɔ malo ni, miatsua onyole lɛkpati nɛ Kaweya Luwi akū.

XXIII Nte bitsua obi lɛkpati nɛ Kaweya luwi akū ayekī beláafum Mose mbla a ni, nde sũ mina

kalokpa ne yĩ akũ kĩ ntsa oti fɔsɔ ne Kaweya Luwi a akũ?

^{XXIV} Mitadã bati ane midze miko koto, mbom midze kale ne ke osi kpĩ akũ.”

Bati Badi Te Atsindze Kĩ Nné Yesu Nye Kristo a.

^{XXV} Yerusalem omato a kame bati badi via kĩ, “Nné oti kĩ Yudafɔ banokɔɛ a lamena kawe kĩ bako a ne awĩ a?”

^{XXVI} Midã kĩ edzẽ ne kanade yale kodzela, kĩ betávia ye kadima. Mbɔɛɛ fɔanya kĩ omaĩ banokɔɛ a nyina nuwĩ kĩ ye nye Kristo a?

^{XXVII} Boe flee bunyina awã kĩ oti kĩ kɔ to, leme nte Kristo a ya ni, odima lelányi awã kĩ eto.”

^{XXVIII} Kĩ Yesu katsa fɔtsa ne Baguma Asoli Kɔla kame a, ebɔa fowɔla kɔɔba ele kĩ, “Kale miale kĩ miti minyina yĩ mo awã kĩ nto a? Ntáya ne yĩ moawe kɔbẽ akũ. Oti a kĩ edo yĩ a nye onokɔalini kĩ mi minyina ye,

^{XXIX} leme yĩ kɔ ñnyina ye, kitonekĩ ye sekẽ nto ñya ade ye lido yĩ a.”

^{XXX} Ne foesũ bewɛ kĩ bapi Yesu, leme odima tákɔa awe eta ye, kitonekĩ ye loko táwo tɔ oto.

^{XXXI} Leme bati kodabu a kame bati pii te ye bido ade bivia kĩ, “Nte Kristo a ya ni, yaakena awãwã fɔtsa pii foba fukĩ oti kĩ lamena kakena a?”

Bido Asoli Kɔla Akũ Badāmenane Kĩ Benaapi Yesu.

^{XXXII} Farisifo nu fɔlets a kĩ bati kodabu a lamena kale petɛɛ petɛɛ ne Yesu akũ a, foesũ bemɔ Yudafɔ basɔfɔnokɔɛ a bido Asoli Kɔla akũ badāmenane a kĩ benaapi ye.

XXXIII Ade Yesu le kī, “Maana ne mi sekē fubuna owi sukuloo, lokoa maadzakū nnaa oti a kī edo yī a sekē.

XXXIV Míawε yī leme miláamɔ yī, kitonekī miláapuli miya ne awā kī maana a.”

XXXV Yudafɔ banɔkɔē a via akū kī, “Ne ndia εwe kī yanaa kī boláapuli bomó ye? Mbɔεε kī yanaa Yudafɔ a kī begba biko ne Helafɔ kame a enaatsa Helafɔ a fɔtsa?

XXXVI Ele kī bóawε ye leme boláamɔ ye, ade boláapuli bɔnaa awā kī yaana a. Foe kayɔ nye litsa?”

Yesu Nyé Nkpā Mui a.

XXXVII Ne luwi nkaε a kī lenye luwi titiliwu ne fuwi kanya kame akū a, Yesu yidza edza ade ebɔa fowola ele kī, “Odi nye odi kī ɔmɔado akɔ ye ni, eya ne yī sekē eyaamɔa mui.

XXXVIII Nde ayekī Katsεle Kpalεwa a le a, ‘Odi nye odi kī ete yī edo ni, nkpā tɔwɔ aatini bito ye ɔwɔle kame.’ ”

XXXIX Yesu kale kɔdzela ne Hūhū a kī bikī betε ye bido a aayate a akū. Ne loko a na kame a, betákpa tǔ Hūhū a, kitonekī betádzela Yesu ewo ne kukūkpale kame.

Kasē Wo Ne Yudafɔ a Kame.

XL Kī bati a badi nu fɔletsa a kī Yesu le a, bele kī, “Ɔnɔkɔali, Baguma Onukpē Ɔnyεne a nye oti kīi.”

XLI Babebā le kī, “Ade Kristo a ne awī a.”

Leme bati bebā kǔ via kī, “Mbɔεε Galilea tite akū Kristo a aato eya?”

XLII Katsɛle Kpalewa a tále kǐ Kristo aato Legã Dawid kasinu a kame, ade baama ye ne Betlehem, ɔmatɔ a kǐ Dawid dzi a kame?”

XLIII Foesũ kasẽ wo ne bati kɔdabu a kame ne Yesu sũ.

XLIV Badi we kǐ bapi ye, leme odima tákɔa awe eta ye.

Yudafɔ Banɔkɔẽ a Táte Yesu Bido.

XLV Kǐ Asɔli Kɔla akũ badãmenane a muniki beya ne Yudafɔ basɔfɔnɔkɔẽ mɔ Farisifo a sekẽ a, bivia be kǐ, “Nde sũ mitápi ye miyamena?”

XLVI Asɔli Kɔla akũ badãmenane a kpa mbuaye kǐ, “Odima tále tã kɔdzela nde ayekĩ oti kǐ ale a!”

XLVII Ade Farisifo a via be kǐ, “Mbɔɛɛ enake mi malo?”

XLVIII Ɖnɔkɔẽ ñye Farisini ɔdabe letɛ ye edo kǐ minyina?

XLIX Ade bati kɔdabu kǐ, kǐ binyína Mose mbla a sũ ni, Baguma dumu be!”

L Nikodemo kǐ enye Farisifo a kame ɔmɔa, kǐ enaa Yesu sekẽ tã a na ne awã. Edo onukpẽ ebi be kǐ,

LI “Boe mbla tákpa boe osi kǐ boakɔ oti kɔto, mbɔɛntɛ bɔdzemɔ ye butse ye onukpẽ kame fɔletsɔ bunyi letsɔ a kǐ ekɛna a.”

LII Bibi ye kǐ, “Mbɔɛɛ Galilea nɔ malo oto? Tsã Katsɛle Kpalewa a kame kadã, lokɔa aamɔ kǐ Baguma onukpẽ ɔnyɛɛ odima láto Galilea.”

LIII (Ke liti a, odi nye odi dzakũ enaa kɔla.)

VIII

Bipi Otsɔle Odi Kǐ Ené Ɖnyɔ Liti.

I Leme Yesu de enaa Kugua Futse Oto a akũ.

II Kĩ kade nyina onone tutuutu a, Yesu muniki eya ne Baguma Asoli Kola a kame. Bati pii yakpota ne ye akũ, ade ekena akũ edzi eyi be fotsa katsa kayo a.

III Yudafɔ mbla batsane mo Farisifo a kpã otsole odi ne adɔpaa kabɔa kame beyadzela ne bati a flee ane kame.

IV Ade bibi Yesu kĩ, “Fotsa Otsane, bipi otsole kĩ kĩ onyole bebã awa mo ye.

V Ne boe mbla a kame ni, Mose kpa otumi kĩ betale otsole kĩ odu boe bekɔ. Litsa no kɔ ale ne foe akũ?”

VI Bivia fukĩ kĩ bakɔa banaĩ ye, ayekĩ baana kale kadi bekɔa bitsua ye onukpẽ.

Leme Yesu kena akũ ekɔa lawobi etsese fotsa ne tite.

VII Kĩ bedza bekavia ye foletsa a, edzela akũ ade ebi be kĩ, “Mi kame owula a kĩ etákena tokpa tidima tɔ ni, enya lotɔ eta de ebɔa otsole a.”

VIII Ade ke ebuki ekena akũ etsese fotsa ne tite a.

IX Kĩ binu foletsa kĩ a, be flee bedzakũ omɔa omɔa, kito banokɔẽ a akũ kenawo kĩ kite Yesu mo otsole a odi ne awã.

X Yesu dzela akũ evia otsole a kĩ, “Boe omã, nde bati a? Be kame odima táte kĩ yakɔ no koto?”

XI Otsole a kpa mbuaye kĩ, “Onokɔẽ, oowo.”

Ade ke Yesu bi ye kĩ, “Kekɔ yĩ malo ntákɔ no koto. Dzakũ kanaa, leme tabuki okena tokpa.”

Yesu Nyé Katinya Kame Jhaĩ.

XII Yesu buki ebi bati a kī, “Yī nye katinya kame ohaĩ, odi nye odi kī etomō yī ni, yaana nkpā ohaĩ a, ade eláatsā ne otū kame da a.”

XIII Farisifo a bi ye kī, “Adi adansie ne nō mōawe akū, foesū nō adansie a tákpola.”

XIV Yesu kpa be mbuaye kī, “Nte madi adansie ne yī mōawe akū malo ni, letsa a kī male a kpola, kitonekī ñnyina awā kī nto mō awā kī manaa a. Mi linyína awā kī nto ñye awā kī manaa a.

XV Miadze foletsa ne batidziwa kamō onukpē, leme yī kō maádzemō odima.

XVI Leme nte maadze mō bati ni, yī kadze a aakpola, kitonekī nné yī odi adze kale, mbom bōmō Nda a kī edo yī a adze foletsa.

XVII Betselē ne mi mbla a kame kī nte adansifo nviā onukpē kena omōa ni, letsa a kī bele a kpola.

XVIII Madi adansie kakpa yī akū, ade Nda a kī edo yī a leme adi yī akū adansie a.”

XIX Bati a via Yesu kī, “Ndia aga deĩ?”

Ekpa be mbuaye kī, “Minyina yī, ñye Nda. Nte kanyina minyina yī ni, kufe míanyi Nda leme.”

XX Yesu le foletsa kī flee ne togole katekō a, kī ekatsa fotsa ne Asoli Kola kame a, leme odima tápi ye, kitonekī ye loko táwo tō otō.

*Yesu Bi Yudafō Banokōē a Kī Beláapuli Bena
Awā Kī Yanaa a.*

XXI Yesu buki ebi be kī, “Maadzakū, ade míawe yī, leme míaku ne mi tokpa kame. Miláapuli minaa awā kī manaa a.”

XXII Ade ke Yudafō banokōē a via kī, “Ye akū yanaako sū mō ele kī, ‘Miláapuli miya ne awā kī manaa a?’”

XXIII Yesu kpa be mbuaye kī, “Tite kī akū mito, leme yī kō ode nto ñya. Katinya kī kame bati miane, leme nné katinya kī kame oti mane.

XXIV Ade foesū mbi mi kī míaku ne mi tókpa kame a. Míaku ne mi tókpa kame nte mitáte mido kī yī nye oti a kī ye mane a.”

XXV Bedani bivia ye kī, “Owei ane?”

Yesu kpa be mbuaye kī, “Letsa a kī mbi mi kito ane kayokayi a, ade foe moape a.

XXVI Ndeñ foletsa pii kī maale ne mi akū nkwa nkwa mi koto, leme oti a kī edo yī a adi onokwali, ade letsa a kī nnu ntomena ye seké a odi mabi katinya kame bati a.”

XXVII Bati a tánu foe kayo kī Olega akū foletsa Yesu kabi be.

XXVIII Foesū ebi be kī, “Nte midela Otidziwa Obi a ne ode a fomó míanyi kī yī nye oti a kī ye mane a. Ade ke míanyi kī maákena letsama ne yī moawe kobé akū, mbom letsa a kī Nda tsa yī kī nle a odi male.

XXIX Oti a kī edo yī a deñ ne yī owé. Etáfone yī odi eyi, kitonekí makena letsa a kī lawo ye ane a daa.”

XXX Kī Yesu le foletsa kī a, bati pii te ye bido.

Bati a Kī Benye Abraham Babi.

XXXI Yesu bi Yudafó a kī bete ye bido a kī, “Nte mite yī fotsa katsa a midomó akū ni, kekó yī fotsa bakolene wī miane.

XXXII Míanyi onokwali a, ade onokwali a aakpa mi akū akū kadzi a.”

XXXIII Bati a kpa ye mbuaye kī, “Abraham babi mo bawa boane, ade botánya tó odima basate a. Nde sū ale kī, ‘Míana akū akū kadzi?’”

XXXIV Yesu bi be kī, “Mabi mi ɔnɔkɔali a kī odi nye odi kī yakena ɔkpa ni, enye ɔkpa ɔsate.

XXXV ɔsate lánya kɔla obi daa, lɛmɛ obinyole kɔ nye kɔla obi daa.

XXXVI Foesū nte Obi a kpa mi akū akū kadzi ni, lokɔa mina akū akū kadzi wī.

XXXVII Īnyina kī Abraham babi mɔ bawa miane, lɛmɛ miawe kī miako yī, kitonekī yī fɔtsa katsa a táwo nɛ mi kame.

XXXVIII Fɔtsa a kī mmó nɛ Nda sekē a, ade foe akū male kodzela a, lɛmɛ mi kɔ miakena letsa a kī mi ɔlega bi mi a.”

XXXIX Bibi ye kī, “Boe ɔlega nye Abraham.”

Yesu kpa mbuaye kī, “Nte Abraham babi mɔ bawa paa miane ni, kufe miakena fɔtsa nde ayekī ekena a.

XL Lɛmɛ miawe kī miako yī oti a kī mbi mi ɔnɔkɔali fɔletsa a kī nte ntomena Baguma sekē a. Abraham tákena fukī odu.

XLI Mi miakena letsa a kī mi ɔlega a kena a.”

Bekpa ye mbuaye kī, “ɔlega mɔape budeī, ade ye nye Baguma a. Bɔnyé adɔpaa kame babi.”

XLII Yesu bi be kī, “Nte Baguma liti enye mi ɔlega ni, kufe miawe yī kale, kitonekī Baguma sekē nto ĩya. Ntáya nɛ yī mɔawe kɔbē akū, mbom Baguma lido yī.

XLIII Nde sū miánu fɔletsa a kī male a kayo? Kitonekī miáwe kī miatse yī fɔletsa a.

XLIV Mi ɔlega Abonsam bade miane, ade miawe kī miakena nɛ mi ɔlega a fɔwetsa akū a. Owudini yane kito anɛ kayokayi, ade yaátomɔ ɔnɔkɔali liti a, kitonekī ɔnɔkɔali leláa ye kame da. Nte

ema fɔvã ni, ye kutitse enye yatsa, kitonekĩ enye ɔvãlevã mo fɔvã ɔlega.

XLV Leme yĩ kɔ ɔnokɔali a mabi mi, ade foesũ miáte yĩ mido a.

XLVI Mi kame owei aapuli ekɔ yĩ kɔtɔ kĩ nkena tokpa? Nte nle ɔnokɔali a ni, nde sũ mitáte yĩ mido?

XLVII Oti kĩ eto Baguma kame a, atse Baguma foletsa. Leme ayekĩ mitáto Baguma kame sũ ni, miáte yĩ foletsa.”

Yesu Mo Abraham.

XLVIII Yudafo a via Yesu kĩ, “Nte bɔle kĩ Samari-ani ane, ade hũhũ kpa leme deĩ ne no kame a ni, botále ɔnokɔali?”

XLIX Yesu kpa be mbuaye kĩ, “Hũhũ kpa adima leláa yĩ kame. Makpa Nda obu leme mi miasupa yĩ.

L Maáwe kĩ mado yĩ akũ obu, leme odi deĩ kĩ yawe foe ade ye adze kakpa yĩ a.

LI Mabi mi ne ɔnokɔali kame kĩ, odi nye odi kĩ yakena ne yĩ fɔtsa katsa a akũ a, leláaku da.”

LII Yudafo a bi ye kĩ, “Ade owi bomó pefee kĩ hũhũ kpa deĩ ne no kame a! Abraham ku, Baguma onukpě banyene a leme ku. Leme no kɔ ale kĩ, ‘Odi nye odi kĩ yakena ne yĩ fɔtsa katsa a akũ a, leláaku da.’

LIII Mbɔee no bẽ boe ɔwanyɔ Abraham kĩ eku a? Baguma onukpě banyene a leme ku. Owei abu kĩ ye ane?”

LIV Yesu kpa be mbuaye kĩ, “Nte mado yĩ mɔawe akũ obu ni, yĩ obu a leláana nfasɔ. Oti a kĩ ye ado yĩ obu a nye Nda, oti kĩ miale kĩ enye mi Baguma a.

LV Minyína Nda a, lεmε yĩ kō ñnyina ye. Nte nle kĩ ñnyína ye ni, maakena ovãlevã ndε mi aye. Lemε nti ñnyina ye ade makena ne ye kale a akũ a.

LVI Mi owanyo Abraham mó kawole kĩ yaamo yĩ kaya. Emó ke lemε ade kawole de ye a.”

LVII Ade ke Yudafɔ a bi ye kĩ, “Otáte tō futeli aduenum malo, ke mo ale kĩ omó Abraham a?”

LVIII Yesu kpa mbuaye kĩ, “Mabi mi ne onokoli kame kĩ, yĩ ndeĩ fomɔ bema Abraham.”

LIX Ade ke bati a fila boe kĩ bata bebɔa ye a, lemε Yesu bela, ade ené ne Baguma Asoli Kola a kame a.

IX

Yesu Binya Oti Kĩ Bema Onekune Ane.

I Kĩ Yesu anaa a, emó onyole odi kĩ bema ye onekune.

II Ade ye fɔtsa bakolene a via ye kĩ, “Fɔtsa Otsane, owei tokpa sũ bema onyole kĩ onekune? Ye moawe tokpa mbɔee ye bamanε tokpa sũ?”

III Yesu kpa be mbuaye kĩ, “Nné onyole kĩ ñye ye bamanε lekεna tokpa, mbom bema ye onekune, ayekĩ baanye Baguma kobē adzuma betsamena ye akũ.

IV Nte budeĩ ne kade kanyina kame ni, kenε kĩ boakεna adzuma bokpa oti a kĩ edo yĩ a. Kade aya kadokō kĩ odima lelápuli ekεna adzuma.

V Kĩ ndeĩ ne katinya kame kĩ ni, yĩ nye katinya kame ohaĩ a.”

VI Kĩ Yesu le fɔletsa kĩ eyua a, etua tane eyi ne tite, efone te ekɔa etsela onyole a ne banebi.

VII Ade ebi ye kī, “Naavole ane ne Siloam Lutubu a kame.” Dī Siloam kayo nye, bido ye. Ade onyole a navole ane, ade emó foko kī emuniki yaya a.

VIII Ye badzikoba mo bikī bekamo ye kī ekawā fotsa a via kī, “Mbōee nné oti kī adzi kawā fotsa a?”

IX Badi le kī, “Ade ye a.” Leme babebā le kī, “Oowo, nné ye yane, kane ené ye.”

Ne foesū oti a moawe le kī, “Ye mane.”

X Bivia ye kī, “Nde foya mo finyaa kō mo amo foko?”

XI Ekpa mbuaye kī, “Onyole a kī bave Yesu lefone tite ekputa yī banebi ade ebi yī kī naavole ane ne Siloam Lutubu a kame. Foesū nnaa adeke, kī nsila nvole ane pe, mpuli mmó foko.”

XII Bivia ye kī, “Nē ndia edei?”

Ekpa be mbuaye kī, “Īnyina.”

Farisifo Via Oti a Kī Ye Ane Bibinya a Foletsa.

XIII Ade ke bati a kpā onyole a kī eku tō ane a bema Farisifo a.

XIV Luwi a kī de akū Yesu fone tite ekōa ebinya ye ane a nye Kaweya Luwi.

XV Foesū Farisifo a leme via ye ayekī fokena fomō bibinya ye ane. Ekpa be mbuaye kī, “Ekōa tite fonewa ekputa yī banebi. Efō nnavole ane, ade finyaakī mpuli mamō foko a.”

XVI Farisifo a badi le kī, “Oti a kī ekena fukī tātō Baguma sekē, kitonekī yaákēna ne Kaweya Luwi mbla a akū.”

Ade babebā leme via kī, “Nde fōaya kī tokpa okenane aapuli ekena nsentseleni kī odu?” Ne foesū kasē wo ne be kame.

XVII Farisifo a buki bivia onyole a kī, “Kī ɔle kī ye libinya nɔ anɛ a ni, nɔ malo litsa odeĩ kī ale nɛ ye akū?”

Onyole a kpa be mbuaye kī, “Baguma onukpě onyene yanɛ.”

XVIII Leme Yudafɔ a táwe kī bate bido kī onyole a nya tǔ ɔnekunɛ fɔmɔ ye anɛ binya, kenawo kī beve ye bamane beyamena.

XIX Ade bivia be kī, “Mi obi a kī mile kī mima ye ɔnekunɛ a nɛ awĩ a? Nde fɔya mɔ finyaa kǔ yamɔ fɔkɔ?”

XX Ye bamane a kpa mbuaye kī, “Bunyina kī boe obi yanɛ, ade bunyina kī bɔma ye ɔnekunɛ a.

XXI Leme ayekī fɔkena fɔmɔ yamɔ fɔkɔ a ni, bunyina foe kǔ, ade bunyina oti a kī ye libinya ye anɛ a leme a. Mivia ye mɔawe a, ebo anɛ, yaapuli enye ye akū onukpě.”

XXII Ye bamane le fɔletsa kī ayekī bekavila Yudafɔ a sũ. Kitonekī Yudafɔ banɔkɔɛ a le biyi kɔkɔɛ kī nte odi te edo kī Yesu nye Kristo a ni, baablɔmena ye nɛ Yudafɔ katsenakǔ a.

XXIII Ade foesũ ye bamane a le kī, “Ebo anɛ, mivia ye mɔawe a!”

XXIV Banɔkɔɛ a ve onyole a kī bema ɔnekunɛ a leyade ade bibi ye kī, “Le ɔnɔkɔali a nɛ Baguma anɛ! Bunyina kī onyole a kī etsa nɔ a nye tɔkpa ɔkenanɛ.”

XXV Onyole a le kī, “Nte enye tɔkpa ɔkenanɛ o-o, ĩye enyé tɔkpa ɔkenanɛ o-o, ĩnyina. Letsa mɔape kī ĩnyina nye kī ĩnya tǔ ɔnekunɛ, leme finyaa mamɔ fɔkɔ.”

XXVI Banokōẽ a via ye kī, “Litsa ekena nō? Nde ekena ebinya nō ane?”

XXVII Ekpa be mbuaye kī, “Mbi mi foe kōkōe lemē miáwe kī miatse foe. Nde sū miawe kī miabuki mitse foe? Mbōe mi malo miawe kī minya ye fōtsa bakōlene?”

XXVIII Bivūna ye bele kī, “Nō odi nye ye fōtsa okōlene, lemē boe kō Mose fōtsa bakōlene bōane.

XXIX Bunyina kī Baguma bi Mose fōletsā, lemē oti a naa kō bunyina awā kī eto malo!”

XXX Ade onyole a bi be kī, “Litsa awāwā fōletsā a? Minyina awā kī eto, lemē ade ye libinya yī ane a!”

XXXI Bunyina kī Baguma látse tōkpa bakenane, lemē yatse bati a kī bakpa ye obu, kakena ne ye yawe akū a.

XXXII Kito ane katinya kayōkayi a, botānu tō kī odi puli ebinya oti kī bema onekune ane.

XXXIII Nte etato Baguma sekē ni, kufe elāapuli ekena letsama.”

XXXIV Banokōẽ a via ye kī, “Katsa atsa kī nō a kī bema bedōla ne tōkpa kame a, nō mbom awe kī atsa boe fōtsa?” Ade beblomena ye ne Yudafō katsenakō a.

Yesu Tsá Bati a Kī Biku Anē Ne Hūhū Kame.

XXXV Yesu nu kī beblomena onyole a ne be kame, foesū kī emó onyole a, evia ye kī, “Ɔte Otidziwa Obi a odo?”

XXXVI Onyole a kpa mbuaye kī, “Ɔnokōẽ, bi yī oti a kī yanē, ayekī maapuli nte ye ndo!”

XXXVII Ade Yesu bi ye kī, “Ɔmó ye kōkōe, ade ye nye oti a kī elamena kōdzela kale mō nō finyaakī a.”

XXXVIII Onyole a le kī, “Boe ɔlate, nte ndo!” Ade ke eke aduli ne Yesu ane a.

XXXIX Yesu le kī, “Ɔya ne katinya kīi kame kī mayaadzemo bati, ayekī banekune aamo foko, ade bikī bamo foko a aadani banekune.”

XL Farisifo a kī bedzē ne awā a badi nu letsa a kī ele a, ade bivia ye kī, “Katsa atsa kī boe malo banekune boane mboee?”

XLI Yesu kpa be mbuaye kī, “Nte kaku mi ane eku ni, kufe beláako mi koto, leme kī miale kī miamo foko sū ni, tokpa deī ne mi akū.”

X

Yesu Bɔa Legbā Ne Baveli ɔkpāne Akū.

I Yesu le kī, “Mabi mi ne onokoali kame kī, oti kī etátsā onyukpē a ewo ne baveli kobā kame, mbom ede etsā kobā a akū ewo ni, enye oyekpane mo oblofo.

II Oti a kī etsā kobā onyukpē ewo a nye baveli okpāne a.

III Ade ye mo kobā onyukpē odzolene a abinya kakpa ye, ade baveli a anu ye odo a. Yave ye bade a buī a kī ete be a, kakpā be kanemena kanya.

IV Nte ekpā be enemena a, yanya be loto, ade baveli a atomo ye, kitonekī binyina ye odo.

V Beláatomo oti bebā, mbom baalo ne ye sekē, kitonekī binyina ye odo.”

VI Yesu bɔa be legbā kīi, leme betánu letsa a kī yatsa a kayo.

Yesu Nyé Baveli ɔkpāne Wī a.

VII Ne foesū Yesu buki ele kī, “Mabi mi onokoali a kī yī nye baveli a kobā onyukpē a.

VIII Bati bebã a kî benya yî loto beya flee a nye bayekpane mo bablofo, foesũ baveli a tátse be foletsa.

IX Yî nye kobã onyukpẽ a. Odi nye odi kî etsã yî akũ ewo ni, yaana kate. Yaawo ene, ade yaana funitsã kanyakõ a.

X Oyekpane aya kî yayaaye, edi awu, ebula fotsa kade. Yî kõ ñya ayekî bati aana nkpã kî ekpola ne osi nye osi akũ.

XI “Yî nye baveli okpãne wî a, baveli okpãne wî a akõa ye nkpã kakpa ne baveli a lolõ.

XII Nte opaani kî enyé baveli okpãne, ade enyé baveli a òlate lemẽ mó kalikii kaya ni, yalo kafone baveli a. Foesũ kalikii a apili baveli a kapansam be.

XIII Opaani a alo kadzakũ kitonekî kaboe bebœe ye kî ekena adzuma a, ade etséla baveli a letsama akũ a.

XIV-XV “Yî nye baveli okpãne wî a. Nde ayekî Nda nyina yî, yî malo ñnyina Nda a ni, ade aye ñnyina yî mawẽ baveli ade be malo binyina yî a. Nkõa yî nkpã nkpa ne be lolõ.

XVI Ndeĩ baveli bebã kî beláa baveli kobã kîĩ kame. Kene kî nkpã be malo ñyamenã, bitse yî odo lokõa be flee baanya baveli katsu mœa, bena ne baveli okpãne mœa kayõ.

XVII “Nda awe yî kale, kitonekî nkõa yî nkpã nkpa, kî maabuki nte ye.

XVIII Odima leláate ye ne yî awe, mbom yî mawẽ lekõa ye nkpa. Ndeĩ osi kî makõa ye nkpa, ade ndeĩ osi kî mabuki nte ye a. Ade letsã a kî Nda do yî kî kene kî nkena a.”

XIX Ne foletsa kī sū kasē buki kiwo ne Yudafō a kame.

XX Be pii, bekale kī, “Hūhū kpa deī ne ye kame! Ye lolō kame bu kade! Nde sū koū miatse ye?”

XXI Leme babebā le kī, “Oti kī hūhū kpa deī ne ye kame leláapuli ele kodzela lómō! Nde koū hūhū kpa aapuli ebinya banekune ane?”

Yudafō a Sī Yesu.

XXII Osili lōkō wo otō, ade Yudafō kanya Baguma Asoli Kōla Akū kakpale Luwi ne Yerusalem a.

XXIII Yesu kamini ne Baguma Asoli Kōla a kako a kī bave Salomo Ablanda a kame.

XXIV Ade Yudafō a nakpota ne ye akū, ade bivia ye kī, “Nde sū ofō bolamena ane kadā kavia? Nte nō nye Kristo a ni, bi boe onokōali a faa.”

XXV Yesu kpa be mbuaye kī, “Mbi mi kōkōe, leme miáte yī mido. Fōtsa a kī makena ne Nda kōbē akū a, adi yī akū adansie.

XXVI Leme miáte kado kitonekī minyé yī baveli.

XXVII Yī baveli atse yī olodo, ñnyina be ade batomō yī a.

XXVIII Makpa be nkpā kī elá kawūna a, ade beláaku bewō da. Odima leláapuli ewāne be ete ne yī awe.

XXIX Fōtsa a kī Nda kōa edo ne yī awe a deī kōbē fōbē letsa nye letsa, ade odima leláapuli ewāne foe ete ne Nda awe a.

XXX Bómó Nda ni, omōa boane.”

XXXI Foesū Yudafō a buki bifila boe kī batale Yesu.

XXXII Ade Yesu bi be kī, “Nkēna fōtsa wī pii kī Nda do yī kī nkēna nē mi anē. Foe kamē fōdabe sū miawē kī miatale yī boe?”

XXXIII Bekpa mbuayē kī, “Nnē fōtsa wī a kī ɔkēna a sū bōawē kī bōatale nō boe, mbom nē mbusuo fōletsa a kī ɔle a sū! Otidziwa kēke anē, lemē awē kī akēna nō akū Baguma!”

XXXIV Yesu kpa be mbuayē kī, “Betselē nē mi mbla ovoli a kamē kī Baguma le kī, ‘Minyē baguma amē.’

XXXV Bunyina kī letsa a kī Katselē Kpalēwa le a nye ɔnɔkɔali daa. Baguma vē bati a kī ekpa be ye ɔlɛdo a kī baguma amē.

XXXVI Yī kō, ɔlɛga a lepau yī edo yī nē katinya kamē. Lɔkɔa nde sū miti miale kī nle fubusuotsa nē ayekī nle kī Baguma Obi manē a sū?

XXXVII Foesū nte nlámēna fōtsa a kī Nda do yī kī nkēna a kakēna ni, mitate yī mido.

XXXVIII Lemē nte makēna foe, titō kī miáte yī kado malo ni, mite fōtsa a kī makēna a mido, ayekī míanyi, minu foe kayɔ yededeede kī ɔlɛga a deī nē yī kamē ade yī malo ndeī nē ɔlɛga a kamē a.”

XXXIX Yudafɔ a buki bēwē kī bapi Yesu, lemē ené nē be kamē edzakū.

XL Ade Yesu muniki enyina Yordan ɔwɔ a enaa awā kī Yohanes wɔla bati mui tō a, enadzi nē awā.

XLI Bati pii ya nē ye sekē, ade bēle kī, “Yohanes tákēna awāwā fōtsa fudima, lemē fōletsa a kī ele nē oti kī akū a flee nē ɔnɔkɔali.”

XLII Bati pii nē awā tē ye bido.

XI

Lazaro Wuda.

^I Onyole odi kī bave Lazaro kaso. Eto Betania, omato a kī bawaētsole nviã Maria mo Marta dzi a kame.

^{II} Ade Maria kīi lekɔa kugua mo olẽ eko ne boe ɔlate foneta, ekɔa ye lolɔ tolɔ eyɔ foe a. Ye ɔwaēnyole nye Lazaro kī yaso a.

^{III} Bawaētsole a do lotɔ ne Yesu sekẽ kī, “Boe ɔlate, nɔ ɔkɔba a kī aátuno ye kale a aso.”

^{IV} Kī Yesu nu foletsa kīi a, ele kī, “Fɔso kīi lenye wuda fɔso, mbom fonye letsa a kī baatsã foe akū bedela Baguma dī ne ode, ade baadela Baguma Obi a lemɛ dī ne ode a.”

^V Yesu awe Marta, mo ɔwaētsole mo Lazaro kale.

^{VI} Lemɛ kī Yesu nu Lazaro fɔso a, ebuki ekaho ne awã kī edeĩ a fuwi nviã.

^{VII} Ke liti a, ebi ye fɔtsa bakolene a kī, “Mifõ bumuniki bonaa Yudea.”

^{VIII} Ade ye fɔtsa bakolene a bi ye kī, “Fɔtsa ɔtsane, wádzo ne awĩ mo Yudafɔ a we kī batale nɔ boe, mo obuki anaa awã a?”

^{IX} Yesu kpa be mbuaye kī, “Nné doũhuile ewua-nviã deĩ ne kade kanyina kame? Odi nye odi kī etsẽ ne suwa ni, eláatula kitonekĩ katinya kame ohaĩ a afõ yamo fɔko.

^X Lemɛ nte odi tsẽ ne lenye ni, yatula kitonekĩ ohaĩ leláa.”

^{XI} Kī Yesu le foletsa kīi eyua a, ebuki ele kī, “Boe ɔkɔba Lazaro wa tida, lemɛ maanaadzela ye.”

^{XII} Ye fɔtsa bakolene a kpa mbuaye kī, “Boe ɔlate, nte tida ewaa kõ ni, yaasaɛ.”

XIII Letsa a kī Yesu atsa a nyε kī Lazaro ku, lemε ye fotsa bakolene a kō kona kī tida pupulidza kawa ελε.

XIV Foesū Yesu binya ebi be pefee kī, “Lazaro ku.

XV Lemε ne mi sū ni, kawole de yī kī ntána ne awā ayekī míate mido. Mifō bōnaa ye sekē.”

XVI Ade Toma kī bave Ata a bi ye bakoba fotsa bakolene a kī, “Mifō boe malo butomō Fōtsa Ōtsane a bōnaa, bōnaaku mō ye!”

Yesu Nyé Kayidza Kadzi Nkpā Mō Nkpā a.

XVII Kī Yesu wo awā a, emó kī fote fuwi ena kī bibila Lazaro.

XVIII Kito Betania kenaa Yerusalem aana ndε fusikū nviā,

XIX ade Yudafo pii ya kī bayaadzam Maria mō Marta ne be owaēnyole wuda a sū.

XX Kī Marta nu kī Yesu aya a, ené enaatselamō ye, lemε Maria kō kaho ne toto kame.

XXI Ade Marta bi Yesu kī, “Boe Ōlate, nte kana ona ne awī kufe nwaēnyole táku!

XXII Lemε ĩnyina kī finyaa malo Baguma aakpa nō letsa nyε letsa kī ovia ye.”

XXIII Yesu kpa ye mbuaye kī, “Awaēnyole a aabuki eyidza edzi nkpā.”

XXIV Ade Marta bi ye kī, “Īnyina kī yaabuki eyidza edzi nkpā ne Luwi Nkaε a kī banokpa aayidza a akū.”

XXV Yesu bi ye kī, “Yī nyε kayidza kadzi nkpā mō nkpā a. Odi nyε odi kī εte yī edo, nte eku malo ni, yaayidza edzi nkpā.

XXVI Odi nyε odi kī edzi nkpā mó εte yī edo ni, εláaku da. Ōte fukī odo?”

XXVII Marta kpa ye mbuaye kī, “Oo, boe ɔlate! Nte ndo kī nɔ nye Kristo a, Baguma Obi a kī beɛ biyi kī yaaya ne katinya kame a.”

Yesu Be.

XXVIII Kī Marta ɛ fukī eyua a, emuniki enaa kola enave ɔwaɛtsole Maria peɛɛ. Ebi ye kī, “Fɔtsa ɔtsane a ya ne awī, ade evia nɔ akū a.”

XXIX Kī Maria nu foe pe, eta eyidza ewula atse enaatselamo ye.

XXX Ne lɔko a naa Yesu táwo tɔ ɔmato a kame, mbom ebuki edzɛ ne awā kī Marta yatselamo ye a.

XXXI Kī bati a kī bidei ne toto kame bekadzam Maria a mó kī eta eyidza ene a, bitomo ye, kitonekī bekona kī yanaa linike a ɔwɛ enaabe.

XXXII Maria yawo awā kī Yesu dzɛ a, ade kī esila emó ye pe eto ne Yesu abɔa kame ɛɛ kī, “Boe ɔlate, nte ɔna ne awī kufe nwaɛnyole a táku.”

XXXIII Kī Yesu mó ayekī ekabe, mó ayekī bati a kī bitomo ye kabe a, fɔkena adzuma ne ye kame ade eweya eke hūū a.

XXXIV Evia be kī, “Ne ndia mibila ye?”

Bekpa ye mbuaye kī, “Boe ɔlate, yaadā.”

XXXV Ne awā naa, Yesu be.

XXXVI Ade Yudafɔ a ɛ kī, “Midā tɔ ayekī yawɛ ye kale!”

XXXVII Leme badi ɛ kī, “Ebinya ɔnekune anɛ. Kapuli eláapuli efɔ kī onyole kī etaku?”

Yesu Dzɛla Lazaro Etomena Kanɔkpa.

XXXVIII Kalɔɛ a buki kena ne Yesu kame ade enaa linike a ɔwɛ a. Linike a nye de ɔke kī bekɔa de bisua de onukpɛ.

XXXIX Yesu bi be kī, “Mibɔɛ de a ne leke a onukpě.”

Ade Marta, ɔnɔkpa a ɔwaɛtsole, bi Yesu kī, “Boe ɔlate, finyaa kɔ̃ edo kakū awe, kitonekī ade fuwi ena kī bibila ye a.”

XL Yesu bi Marta kī, “Mbɔɛɛ ntábi nɔ kī nte ɔte odo ni, aamɔ Baguma kukūkpaɛ a?”

XLI Bati a bɔɛ de a benye. Yesu dɛla anɛ ne ode ɛɛ kī, “Nda, manye nɔ kɔɛ kī atse yī.

XLII Ìnyina kī atse yī daa, lemɛ bikī bedzě ne awī a sū male fukī, ayekī baate bido kī nɔ lido yī.”

XLIII Kī ɛɛ fukī eyua a, ɛbɔa fɔwɔla kɔɔba kī, “Lazaro, né kaya!”

XLIV Ade ɔnɔkpa a né ɛya a. Lima a kī bekɔa bisuli ye akpɔ mɔ abɔa a buki lena ne ye akū, ade duku a kī bekɔa bisuli ye anɛ a lemɛ na ne ye akū a.

Yesu bi be kī, “Miwūnya tilima a ne ye akū mifɔ̃ enaa.”

Yudafɔ a Nasui Kī Baakɔ Yesu.

XLV Yudafɔ a kī beya ne Maria sekě mɔ letsa a kī Yesu kena a, ade be pii te ye bido a.

XLVI Lemɛ be kame badi muniki benaa Farisifo a sekě benabi be letsa a kī Yesu kena a.

XLVII Foesū Farisifo a mɔ basɔfɔnɔkɔ̃ a natsa fɔɔ mɔ Yudafɔ ɔmaĩ banɔkɔ̃ a ade beɛ kī, “Litsa bɔ́akena? Kitonekī oti kī lamena awāwā fotsa pii kakena!

XLVIII Nte bɔkpa ye osi lomɔ ni, odi nye odi aayatɛ ye edo, ade Roma abāã ayabubuli boe Asɔli Kɔla a, ɛwɔla boe ɔmaĩ lemɛ.”

XLIX Be kame ɔmɔa kī bave Kaiafa, kī enye Ɔsɔfɔnɔkɔɛ Flee ne kateli a na kame a bi be kī, “Minyína letsama kɔlaa!

^L Minyína kī fɔnɛnɛ fɔkpa mi kī oti mɔa aaku ne bati a flee lɔlɔ keba kī baawɔla ɔmaĩ a flee a?”

^{LI} Nné ye mɔawe kakɔna ekɔa ele fukū, mbom nde Ɔsɔfɔnɔkɔɛ Flee ne kateli a kame ni, ele eyi kī Yesu aaku ne Yudafo a lɔlɔ.

^{LII} Nné Yudafo a odi yaku ekpa, mbom kī yaakpɔta Baguma bade a kī begba biko ne katinya kame a bekɛna ɔmɔa.

^{LIII} Kito luwi a kanaa a, Yudafo banɔkɔɛ kapi adzuni kī baako Yesu.

^{LIV} Ne foesū Yesu tábuki ekane kanya Yudafo a lemɔ ye. Edzakū enaa ɔmato odi kī bave Efrayim kame ne kɔsa kudi kame, ade awā bemɔ ye fɔtsa bakɔlene a bidzi ne awā a.

^{LV} Finyaa Yudafo Wuda Katē luwi kanya a fuā, ade bati pii to ɔmaĩ a fɔko kumekume beya ne Yerusalem, kī bayaakpale be akū fomɔ luwi a aawo ɔto.

^{LVI} Kī bɛna ne Asoli Kɔla kame a, bekawe Yesu, ade bekavia akū kī, “Nde akɔna? Mbɔɛɛ eláaya ne luwi a kanyakɔ?”

^{LVII} Ne lɔko a na kame a, basɔfɔnɔkɔɛ mɔ Farisifo a si mbla kī odi nye odi kī enyina awā kī Yesu deĩ ni, kene kī eyaakpa kanyi lɔkɔa bɛnaapi ye.

XII

Maria Tsela Yesu Kugua Mɔ Ɔlɛ Ne Betania.

^I Kī kite fuwi evū kī banya Wuda Katē Luwi a, Yesu naa Betania, Lazaro ɔto, awā kī edzela ye etomena kanɔkpa a.

II Beto olobe funitsã bekpá ye ne awã. Marta sum ne opunu akũ, ade Lazaro leme na ne bati a kĩ bidzi bekanya mo Yesu a kame a.

III Ade Maria boe kugua mo olẽ baũ, kĩ bave koe nard, kĩ kudeĩ koya paa lita seke eyatsela Yesu foneta, ade ekoa ye lolõ tolo eyo foe akũ a. Kugua a olẽ te toto a flee kame.

IV Ye fotsa bakolene a kame omoa, Yuda Iskar-iot, kĩ ye aanye Yesu ekpa a le kĩ,

V “Nde sũ betáno kugua kĩ sika ovoe oha elale lokoa bekoa se bekpá ahiãfo?”

VI Nné kĩ etsela ahiãfo akũ sũ ele fukĩ, mbom oyekpane yane. Ye nee sika kuvũ a ade yado awe ne koe kame a.

VII Ade Yesu le kĩ, “Mifone ye awe! Mifõ emané koe eyi ekpa yĩ kabila.

VIII Ahiãfo deĩ ne mi kame luwi nye luwi, leme yĩ kã nláana ne mi kame daa.”

Yudafõ a Sui Ne Lazaro Akũ.

IX Yudafõ pii nu kĩ Yesu deĩ ne Betania, foesũ beya ne awã. Nné Yesu odi sũ beya, mbom kĩ bayaadã Lazaro a kĩ Yesu dzela etomena kanokpa a.

X Ne foesũ basofonokoẽ a pi adzuni kĩ baako Lazaro leme,

XI kitonekĩ ye sũ Yudafõ a pii kasĩ be kanaate Yesu kado.

Yesu Wo Ne Yerusalem Omato a Kame Mo Osee Katu.

XII Kĩ kade nyina a, bati kodabu a kĩ beya ne Wuda Katẽ Luwi kanyakõ a nu kĩ Yesu aya ne Yerusalem.

XIII Foesũ bebɔe tuko bene kĩ banaatselamɔ ye, ade bekabɔa fɔwɔla kĩ,
 “Mimu Baguma!

Baguma hila oti a kĩ yaya ne boe ɔlate dĩ akũ a!
 Baguma hila Israel Legã a!”

XIV Yesu mó aflimu adi, ade ede edzi ne ye akũ nde ayekĩ Katsɛle Kpalewa a le kĩ,

XV “Zion ɔmato, tavila!

Amo no Legã kĩ laya!

Edzi ne aflimu obi akũ.”

XVI Ye fɔtsa bakɔlene a tánu fukĩ kayɔ ne loko a na kame, leme kĩ Baguma dzela Yesu ekpale ye akũ a, beyate ane kĩ Katsɛle Kpalewa a le letsa a kĩ bekena bekpa ye a ne ye akũ.

XVII Bati a kĩ bena ne Yesu sekẽ, ne loko a kĩ eɛe Lazaro etomena linike kame edzi nkpã a, di adansie ne letsa a kĩ leya a akũ.

XVIII Ade fukĩ sũ bati kodabu a natselamɔ Yesu a, kitonekĩ binu kĩ ekɛna awãwã fɔtsa kĩ.

XIX Foesũ Farisifo a bi akũ kĩ, “Midã kĩ bɔlámɔ kadzakõ kana kolaa. Midã, katinya kame bati a flee né bitomɔ ye!”

Helafɔ Badi We Kĩ Bamɔ Yesu.

XX Helafɔ badi na ne bati a kĩ benaa Yerusalem kĩ baasum Baguma ne luwi a kanya kame a kame.

XXI Ade benaa Filipino, kĩ eto Betsaida a ne Galilea sekẽ, ade bibi ye kĩ, “ɔnokõẽ, boawe kĩ boamɔ Yesu.”

XXII Filipino nabi Andrea, ade be nviã a benabi Yesu a.

XXIII Ade Yesu bi be kĩ, “Finyaa kõ loko a wo ɔto kĩ baadela Otidziwa Obi a ne ode.

XXIV Mabi mi ne ɔnɔkɔali kame kī nte ligbanɔbi táwo ne tite kame levõ ni, libi mɔape kei a lane, leme nte levõ ni, lado babi beblebee.

XXV Odi nye odi kī yawe ye nkpā kale ni, yaayela ye, leme odi nye odi kī ekesi ye nkpā ne katinya kīi kame ni, ekola ye ekpa nkpā kī ela kawūna a.

XXVI Odi nye odi kī yawe kī yasum yī ni, kene kī etomɔ yī, kitonekī awā kī ndei a, ade awā yī ɔsumune leme ana a. Ade Nda aado obu ne odi nye odi kī yasum yī akū.

Yesu Le Kodzela Ne Ye Wuda Akū.

XXVII “Yi ɔwɔle aha yī finyaa. Leme litsa maale? Kale maale kī, ‘Nda, nye yī katomena lubo kamɔ lɔkɔ kīi kame mbɔɛɛ’? Oowo, ade foesū iya ne katinya kame a, ayekī maatsā lubo kamɔ lɔkɔ kīi kame.

XXVIII Nda, do nɔ dī akū obu.”

Adeke odo odi to ode ele kī, “Ndo de obu kɔkɔɛ, ade maabuki ndo de a.”

XXIX Bati kodabu a kī bedzē ne awā nu odo a, ade be kame badi le kī, ɔplala lenye onukpē, leme badi le kī, “Ode foto ɔnyane odi lele kodzela mɔ ye!”

XXX Leme Yesu bi be kī, “Nné yī sū odo a lé kodzela, mbom mi sū.

XXXI “Finyaa nye lɔkɔ a kī Baguma aadzemɔ katinya kame. Finyaa mɔ baablomena katinya kīi kame akū ɔnyane a.

XXXII Nte bedela yī ne ode ne asendua akū ni, maavele bati flee iyamena ne yī sekē.”

XXXIII Yesu le fukīi yakɔa etsa wuda odu a kī yaaku.

XXXIV Adeke bati kodabu a kpa ye mbuaye kī, “Boe Mbla Ovoli a atsa boe kī Křisto a aadzi nkpā daa. Nde foya mo ale kī baadela Otidziwa Obi a ne ode ne asendua akū? Owei nye Otidziwa Obi kī a?”

XXXV Yesu kpa be mbuaye kī, “Ohaī a aabuki ena ne mi sekē loko lukū lidi pe. Loko kī ohaī a deī ne mi kame ni, mitsā ne ye kame ayekī otū leláake edo mi, kitonekī oti kī etsē ne otū kame linyina awā kī yanaa.

XXXVI Kī ohaī a deī ne mi sekē kī ni, mite ohaī mido ayekī míakena ohaī a kame bati.”

Bati a Katate Kado.

Kī Yesu le folets a kī eyua a, edzakū ne be sekē enabela.

XXXVII Titō kī Yesu kena awāwā fotsa kī flee ne be ane kame malo ni, betáte ye bido.

XXXVIII Ayekī lets a kī Baguma Onukpē Onyene Yesaya le eyi a, aaya ne foe kame kī, “Boe Olate, owei lete no folets a kī bole a edo? Owei enye ye kobē etsa?”

XXXIX Ne foesū betápuli bete bido, kitonekī Yesaya buki ele kī,

XL “Baguma ko be ane ade esua be adzuni

ayekī be ane leláamo foko,

ade be adzuni leláanu folets a kayo a.

Baguma le kī, ‘Beláamuniki beya ne yī sekē loko a ntsa be.’ ”

XLI Yesaya le folets a kī kitonekī emó Yesu kukūkpale a, ade ele kale ne foe akū eyi a.

XLII Titō kī fola lomo malo a, Yudafō banokoē a pii te Yesu bido, leme ne Farisifo a sū betále foe

akū kɔdzela ne kanade, ayekī beláablomena be ne be katsenakõ a.

XLIII Kitonekī bawe kī batidziwa bimu be keba kī Baguma aamu be.

Yesu Fɔletsɔ a Aako Bati Kɔtɔ.

XLIV Ade Yesu bɔa fowɔla eɛ kī, “Odi nye odi kī eɛe yī edo ni, nné yī odi eɛe edo, mbom mɔ oti a kī edo yī a eɛe edo.

XLV Odi nye odi kī yamɔ yī ni, yamɔ oti a kī edo yī a lemɛ.

XLVI Ìya ne katinya kame nde ɔhaĩ aye, ayekī odi nye odi kī eɛe yī edo ni, eláana ne ɔtū kame.

XLVII “Nte odi nu yī fɔletsɔ a mó etákɛna ne foe akū ni, nláadzɛmɔ ye. Ntáya kī mayaadzɛmɔ katinya kame bati, mbom ìya kī mayaanye be.

XLVIII Oti a kī esí yī, kī etáte yī fɔletsɔ a deĩ oti kī yaadzɛmɔ ye. Fɔletsɔ a kī nle a aadzɛmɔ ye ne luwi nkaɛ a akū!

XLIX Fukī nye ɔnɔkɔali, kitonekī ntále kɔdzela ne yī mɔawe otumi akū, mbom Nda a kī edo yī a lekpa yī otumi kī nle kɔdzela, nle fɔletsɔ a kī nle a.

L Ade ìnyina kī ye mbla a akpa nkpā kī elá kawūna a. Ne foesū fɔletsɔ a kī male a nye fɔletsɔ kī Nda bi yī kī nle.”

XIII

Yesu Vɔle Ye Fɔtsa Bakɔlɛɛ a Abɔa.

1 Luwi a kī lenyaa Wuda Katē Luwi lotɔ a, Yesu nyi kī lɔkɔ kpɔla ye kī yaadzakū ne katinya kīĩ kame enaa ɔlɛga sɛkē. Ewe bikī benye ye bade ne katinya kame a kale, ade ewe be kale kenawo kawūnakõ a.

II Yesu mọ ye fọtsa bakolene a dzi ne opunu akū bekanya olobe funitsā. Abonsam kọa edo ne Yuda kī enye Simon Iskariot obi a adzuni kame kọkọe kī enye Yesu ekpa.

III Yesu nyina kī Ọlẹga kpa ye kọbē flee. Enyina kī Baguma sekē eto ẹya, ade Baguma sekē yaabuki enaa a.

IV Foesū eyidza ne opunu a akū, enye ye atadie wulaa eyi ne ọwē, ade ekọa ọsa efili ne kate a.

V Ke liti a, eko mui ne lọda kame, eyi ye fọtsa bakolene a abọa kavole kayọ, ade ekọa ọsa a kī efili ne kate a ẹyo mui a.

VI Kī ewo Petro sekē a, Petro bi ye kī, “Boe Ọlate, ayaavole yī abọa?”

VII Yesu kpa ye mbuaye kī, “Finyaa oláanu letsa a kī makena a kayọ, lemme ke liti aanu foe kayọ.”

VIII Petro bi ye kī, “Owoo, oláavole yī abọa da.” Ade Yesu bi ye kī, “Nte ntávole nọ abọa ni, ke kọ oláabuki onya yī fọtsa okolene.”

IX Petro kpa ye mbuaye kī, “Boe Ọlate, nte aye kọ ni, tavole yī abọa odi, mbom vole yī awe mọ lọlọ lemme!”

X Yesu bi ye kī, “Oti kī ewo mui ené yededeede tábuki esī ekpa mui kawo, keba abọa odi kavole. Mi kọ mi flee akū né, mbọente oti mọape.”

XI Yesu nyina oti a kī yaanye ye ekpa a kọkọe, ade foesū ele kī, “Mi a flee akū né, mbọente oti mọape a.”

XII Kī Yesu vole ye fọtsa bakolene a abọa eyua a, ebọe ye atadie wulaa a edo, emuniki enadzi ne ye kadzikọ ne opunu akū. Evia ye fọtsa bakolene a kī, “Minu letsa a kī nkena nkpa mi a finyaa kayọ mbọee?”

XIII Miave yĩ kĩ Fotsa Otsane mo Olate. Ade aye fola pεpεεpe a, kitonekĩ ade letsa a kĩ mane a.

XIV Yĩ a kĩ ñnye mi Olate mo Fotsa Otsane a, levole mi aboa finyaa, foesũ kene kĩ miavole akũ akũ aboa.

XV Nfantuhũ fɔane nkpa mi kĩ mi malo mikena letsa moape a kĩ nkena nkpa mi a.

XVI Mabi mi ne onokɔali kame kĩ osumune lebé ye olate, ade ayea foto onyane lebé oti a kĩ edo ye foto a.

XVII Finyaa, kĩ minyi onokɔali kĩ a, Baguma aahila mi nte mikena ne ke akũ.

XVIII “Nné mi flee male, ñnyina bati a kĩ mpau a. Leme kene kĩ Baguma folets a kĩ betsele biyi a foya ne foe kame kĩ, ‘Oti a kĩ bomo ye budo awe boanya a yidza edza ne yĩ akũ.’

XIX “Mabi mi fukĩ ñyi finyaa, fomɔ fɔaya ne foe kame lokɔa míate mido kĩ yĩ nye oti a kĩ ye mane a.

XX Mabi mi ne onokɔali kame kĩ odi nye odi kĩ ete oti odi kĩ ndo foto ni, yĩ ete. Ade odi nye odi kĩ ete yĩ ni, ete oti a kĩ edo yĩ a.”

Yesu Le Eyi Kĩ Odi Aanye Ye Ekpa.

XXI Kĩ Yesu le folets a kĩ eyua a, foha ye owole paa ade ele yededeede kĩ, “Mabi mi ne onokɔali kame kĩ mi kame odi aanye yĩ ekpa.”

XXII Awã naa, ye fotsa bakolene a dã akũ ane, ade bekena saa kitonekĩ binyina be kame oti a kĩ Yesu ale a.

XXIII Fotsa bakolene a kame omɔa kĩ Yesu awe kale a dzi emenamɔ Yesu.

XXIV Adeke Simon Petro baa ye sene kĩ, “Via ye owula a kĩ yale a.”

XXV Foesũ fɔtsa ɔkolene a fuã Yesu tsemetseme evia ye kĩ, “Boe ɔlate, owei yane?”

XXVI Yesu kpa mbuaye kĩ, “Oti a kĩ maabuli abodoo ntamɔ kutu nkpa a ni, ade ye a.” Ade ebuli abodoo sekẽ, eta kutu ekɔa ekpa Yuda kĩ enye Simon Iskariot obi a.

XXVII Kĩ Yuda sila ete funitsã a pe, Satana wo ne ye kame.

Ade Yesu bi ye kĩ, “We sɔwa ne letsa a kĩ awe kĩ akena a akũ.”

XXVIII Leme be a kĩ bidzi ne opunu akũ mɔ ye a kame odima tánu letsa a sũ kĩ Yesu bi ye tuwuli kayɔ.

XXIX Ayekĩ Yuda neɛ be sika kuvũ sũ ni, fɔtsa bakolene a badi kɔna kĩ kabi Yesu bi ye kĩ enaaya fɔtsa a kĩ baakɔa benya luwi a, ãye kĩ enaakɔa litsedi ete ahiãfo.

XXX Kĩ Yuda te funitsã a, deedimɔape ené edzakũ. Kade dɔ paa.

Yesu Kpa Mbla Vɔẽ.

XXXI Kĩ Yuda ne edzakũ a, Yesu le kĩ, “Finyaa bedela Otidziwa Obi a dĩ ne ode, ade finyaa bedela Baguma dĩ leme ne ode betsãmena ye akũ a.

XXXII Nte bedela Baguma dĩ ne ode betsãmena Otidziwa Obi a akũ ni, lɔkɔa Baguma aadela Otidziwa Obi a dĩ ne ode ne ye mɔawe kame letaleta.

XXXIII “Yĩ babi, nláabuki nna ne mi sekẽ owi libuna pii. Míawe yĩ, leme finyaa mabi mi fɔletsã a kĩ mbi Yudafɔ banɔkɔẽ a kĩ, ‘Miláapuli minaa awã kĩ manaa a.’

XXXIV “Finyaa makpa mi mbla vǎě. Miwe mi akū kale. Ayekī nwe mi kale a ni, mi malo miwe mi akū kale lǎmǎ.

XXXV Nte miawe mi akū kale ni, odi nye odi aamǎ eyi ǎsū kī yī fǎtsa bakolene miane.”

Yesu Le Eyi Kī Petro Aasī Kī Enyína Ye.

XXXVI Ade Simon Petro via kī, “Boe ǎlate, ne ndia akpa?”

Yesu kpa ye mbuaye kī, “Awā kī manaa, ǎláapuli otomǎ yī finyaa bǎnaa, lǎme ke liti ni, aatomǎ yī liti.”

XXXVII Petro via ye kī, “Nde sū nláapuli ntomǎ nǎ finyaa? Mmane akū kī maaku ne nǎ lolǎ!”

XXXVIII Yesu kpa ye mbuaye kī, “Kale ale kī ǎmane akū kī aaku ne yī lolǎ? Mabi nǎ ǎnǎkǎali a kī fǎmǎ ǎkǎkǎ aabe ni, aale titi elale kī onyína yī.”

XIV

Yesu Nyé Osi a Kī Enaa ǎlega a Sekě.

I Yesu bi be kī, “Mitafǎ fǎlets a kī leha mi. Mite Baguma mido, mite yī malo mido.

II Fǎla beblebee deī ne Nda tǎtǎ kame. Man-aamane kakǎ kadi īyi mi. Nte fǎlá lǎmǎ ni, kufe nláabi mi kī manamane kadzikǎ īyi mi.

III Ade nte nnaa nmanane kadzikǎ īyi mi īyua ni, maamuniki īyaakpā mi nmanena yī sekě, ayekī awā kī ndeī a mi malo míana ne awā.

IV Minyina osi a kī ewaa enaa awā kī manaa a.”

V Ade Toma bi Yesu kī, “Boe ǎlate, bunyína awā kī anaa, fǎesū nde bǎakena bǎmǎ osi a kī yanaa awā a?”

^{VI} Yesu kpa ye mbuaye kī, “Yī nye osi a, ɔnɔkoali a mɔ nkpā a. Odima láya ne Nda sekē mbɔente etsā yī akū.

^{VII} Nte kanyina minyina yī ni, kufe minyina Nda lemε. Lemε kito finyaa kanaa ni, minyina ye ade mimó ye lemε a.”

^{VIII} Ade Filipino bi Yesu kī, “Boe ɔlate, tsa boe ɔlega a, ade letsa a kī liti lisī boe a.”

^{IX} Yesu bi ye kī, “Filipo, owi buna kī ndeī ne mi flee sekē, lemε onyina yī? Odi nye odi kī emó yī ni, emó Nda lemε. Nde sū obuki avia kī, ‘Tsa boe ɔlega a’?”

^X Filipino, mbɔεε ɔtáte odo kī ndeī ne Nda kame ade kī ye malo edeī ne yī kame? Fɔletsa a kī mbi mi a flee táto yī sekē, mbom Nda a kī edeī ne yī kame a lamena ye adzuma kakena.

^{XI} Mite yī mido nte nle kī ndeī ne Nda kame, ade Nda lemε deī ne yī kame a. Nte mitáte fɔletsa kī mido ni, ke kō mite mido ne adzuma a kī makena a sū.

^{XII} Mabi mi ne ɔnɔkoali kame kī odi nye odi kī εte yī edo ni, yaakena letsa a kī makena a. Nuwī yaapuli ekena fɔtsa εba yī fude a, kitonekī manaa Nda sekē.

^{XIII} Letsa nye letsa kī míavia ne yī dī akū ni, maakena foe nkpa mi ayekī baatsā Obi a akū bedεla Nda dī ne ode.

^{XIV} Nte mivia litsedi ne yī dī akū ni, maakena foe.”

Yesu Le Hühū Kpalɛwa a Kayamena Eyi.

^{XV} Yesu buki εle kī, “Nte miawe yī kale ni, míakena ne yī tεbla a akū.

XVI Maake Nda aduli ekpa mi Obumenane bebã kī yaana ne mi sekē daa.

XVII Ade ye nye Hūhū a kī yanye onokwali kale ne Baguma akū a katsa a. Katinya kame bati kō lēlāapuli bete ye, kitonekī belāapuli bemó ye mō baanyi ye. Leme mi kō minyina ye kitonekī yaana ne mi sekē ade edeī ne mi kame a.

XVIII “Nlāafone mi awe īyi nde banokpabi aye. Maamuniki īya ne mi sekē.

XIX Kite sukuloo katinya kame bati lēlāabuki bemó yī, leme mi kō míamō yī. Ayekī ndzi nkpā sū ni, mi malo míadzi nkpā.

XX Nte luwi a wo oto ni, míanyi kī ndeī ne Nda kame ade mi mideī ne yī kame ade yī malo ndeī ne mi kame a.

XXI “Oti a kī epini yī tebla, yakena ne te akū ni, ade ye nye oti a kī yawe yī kale a. Oti a kī yawe yī kale ni, Nda aawe ye kale. Yī malo maawe ye kale ade maanye yī akū ntsa ye a.”

XXII Ade Yuda, nné ekī enye Iskariot a, via kī, “Boe Olate, nde sū aanye nō akū otsa boe, mō nné katinya kame bati a?”

XXIII Yesu kpa ye mbuaye kī, “Odi nye odi kī yawe yī kale ni, yaapi yī foletsa edomō akū. Nda aawe ye kale ade bōmō Nda bóaya ne ye sekē bokena kadzikō ne ye sekē.

XXIV Odi nye odi kī yaáwe yī kale ni, yaápi yī foletsa kadomō akū. Foletsa a kī minu a lenyé yī mōawe fude, mbom futo Olega a kī edo yī a fude fōane.

XXV “Mbi mi foletsa kīī ne loko a kī mbuki ndeī ne mi sekē.

XXVI Leme Obumenane a kī enye Hūhū Kpalēwa kī Baguma aado ne yī dī akū a, aatsa mi letsa nye letsa, ade yaate mi ane ne letsa nye letsa kī mbi mi a akū a.

XXVII “Lukudo nkɔa mayi mi. Yī lukudo nkɔa makpa mi, nné nde ayekī katinya kame bati akpa a aye. Mitafō mi ɔwɔle leha mi ñye mifō libe liwo mi.

XXVIII Minu ayekī mbi mi kī, ‘Madzakū, leme maamuniki ñya ne mi sekē.’ Nte miwe yī kale ni, kufe kawɔle de mi kī manaa ɔlega a sekē, kitonekī ye ebē yī.

XXIX Finyaa mbi mi fukī ñnyamena loto fomo letsa nye letsa aaya ne foe kame, ayekī nte foya ne foe kame ni, miate mido.

XXX Nlábuki nle mo mi kɔdzela nnamena loto, kitonekī katinya kame akū ɔnyane a aya, ade elá kɔbē ne yī akū a.

XXXI Leme kene kī katinya kame bati binyi kī mawe ɔlega a kale, ade makena ne ye ɔledo akū pepepe a.

“Finyaa, miyidza bɔdzakū ne awī.

XV

Yesu Nye Kutse Wī a.

I “Yī nye kutse wī a, ade Nda nye futse kɔba ɔneɛ a.

II ɔnane odi nye odi kī edeī ne yī akū kī yaáwū babi ni, yatsua ye kamuni, ade ɔnane odi nye odi kī yawū babi ni, yanye ye akū tɔɔta, ayekī yaawū babi pii.

III Finyaa yī foletsa a kī mbi mi a kpale mi akū kɔkɔe.

IV Mikena ɔmɔa mɔ yĩ, yĩ malo nkɛna ɔmɔa mɔ mi. Nde ayekĩ kutse ɔnanɛ lɛláapuli kuwũ nɛ koe akũ, mbɔentɛ kɔmanɛ nɛ kutse ɔma akũ a, ade aye mi malo miláapuli miwũ babi nte mitákɛna ɔmɔa mɔ yĩ a.

V “Yĩ nyɛ kutse a, ade mi minyɛ tɛnanɛ a. Oti a kĩ ɛkɛna ɔmɔa mɔ yĩ, mɔ yĩ malo nkɛna ɔmɔa mɔ ye ni, ade ye aawũ babi pii, kitonɛkĩ nte nláa mi kame ni, miláapuli mikɛna letsama.

VI Oti a kĩ ɛláa yĩ kame ni, ɛla ndɛ ɔnanɛ kĩ bitsua beta bimuni ade yawɔlɛ a. Bakpɔta tɛnanɛ a kafila kado nɛ fi kame tavio.

VII Nte mikɛna ɔmɔa mɔ yĩ, mɔ yĩ fɔletsɛ a deĩ nɛ mi kame ni, míavia letsɛ a kĩ miawɛ ade baakɛna foe bɛkpa mi a.

VIII Nte miwũ babi beblebee ni, foe fɔnyɛ Nda kukũkpale fɔtsa, ade fusipi kĩ yĩ fɔtsa bakɔlɛnɛ mianɛ.

IX Ayekĩ Nda awɛ yĩ kalɛ a ni, ade aye yĩ malo mawɛ mi kalɛ a. Foesũ mifɔ̃ yĩ ɔɔɔ a ɛna nkɔsu nɛ mi kame lɔmɔ.

X Nte mipi yĩ tɛbla a midomɔ akũ ni, míana nɛ yĩ ɔɔɔ a kame ndɛ ayekĩ yĩ malo mpi Nda mbla ndomɔ akũ fɔfɔ̃ ye ɔɔɔ deĩ nɛ yĩ kame a.

XI “Mbi mi fɔletsɛ kĩ ayekĩ kawɔlɛ a kĩ kideĩ nɛ yĩ kame a odu kɛna nɛ mi kame, lɔkɔa mi kawɔlɛ a kekpɔla.

XII Ade yĩ mbla kĩ makpa mi nyɛ kĩ, miwɛ mi akũ akũ kalɛ ndɛ ayekĩ nwe mi kalɛ a.

XIII ɔɔɔ titiliwu adima lɛláa kĩ oti akɔa ye nkpã ɛbɔa afɔliɛ nɛ bakɔba lɔlɔ.

XIV Nte mikɛna nɛ yĩ mbla a kĩ nkpa mi a akũ a ni, lɔkɔa minyɛ yĩ bakɔba.

XV Nláabuki nɛ mi kǐ basumunɛ, kitonɛkǐ ɔsumunɛ linyína letsa a kǐ ye ɔlate akɛna. Lɛmɛ mave mi kǐ bakɔba kitonɛkǐ letsa nɛ letsa a kǐ nnu ntomena Nda sɛkɛ ni, nfɔ minyi foe.

XVI Nnɛ mi lɛpau yǐ, mbom yǐ lɛpau mi ndzina mi kǐ minaawũ babi beblebee kǐ baawa daa. Nɛ foesũ letsa nɛ letsa kǐ míavia ɔlɛga a nɛ yǐ dǐ akũ ni, yaakpa mi foe.

XVII Foesũ ade mbla kǐ makpa mi kǐ miwɛ mi akũ kalɛ.”

Katinya Kame Likesĩ.

XVIII Yesu buki ɛɛ kǐ, “Ntɛ katinya kame bati akesĩ mi ni, minyi kǐ benya lɔtɔ bikesĩ yǐ.

XIX Ntɛ katinya kame bade mianɛ ni, kufɛ baawɛ mi kalɛ ndɛ be bade aye. Lɛmɛ kǐ mpau mi ntomena katinya bati kame ade mibuki minyé be bade a sũ ni, katinya kame bati akesĩ mi.

XX Mite anɛ nɛ kalɛ a kǐ mbi mi akũ a kǐ, ‘ɔsumunɛ lɛbé ye ɔlate.’ Ntɛ bati yidza bɛdza nɛ yǐ akũ ni, baayidza bɛdza nɛ mi malo akũ. Ntɛ bipi yǐ fɔletsa bidomɔ akũ ni, baapi mi fude lɛmɛ bidomɔ akũ.

XXI Lɛmɛ baakɛna fukĩ flee nɛ mi akũ nɛ yǐ dǐ sũ, kitonɛkǐ binyína oti a kǐ edo yǐ a.

XXII Ntɛ ntayaabi be fɔletsa ni, kufɛ betáku tɔkpa kɔtɔ. Lɛmɛ finyaa bɛkɛna tɔkpa ade belá onukpɛ kanyɛ kadima a.

XXIII Odi nɛ odi kǐ yakesĩ yǐ ni, yakesĩ Nda lɛmɛ.

XXIV Ntɛ ntakɛna fɔtsa kǐ odima tákɛna tɔ nɛ be kame ni, kufɛ betákɛna tɔkpa, lɛmɛ kǐ finyaa bɛmó fɔtsa a kǐ nkɛna a malo ni, bakesĩ bɔmɔ Nda.

XXV Leme fukĩ flee ya ne foe kame ayekĩ folets a kĩ betsele ne be mbla ovoli kame a, foya ne foe kame kĩ, ‘Bikesĩ yĩ pupulidza.’

XXVI “Maado Obumenane eto ɔlega a sekẽ eya ne mi sekẽ. Ade ye nye Hũhũ a kĩ yaanye ɔnokɔali a ne Baguma akũ etsa a. Nte eto ɔlega a sekẽ eya ni, yaadi adansie ne yĩ akũ.

XXVII Mi malo míadi adansie, kitonekĩ mina ne yĩ sekẽ kito kayokayi a.

XVI

I “Mbi mi folets a kĩ flee ayekĩ bati leláfõ akpo liveli mi ne mi katokado kame.

II Baablomena mi ne Yudafõ fotsenakõ. Loko aya kĩ nte oti odi ko mi ni, yaakona kĩ Baguma adzuma ekena.

III Bati aakena fukĩ ne mi akũ kitonekĩ betányi ɔlega a ñye yĩ.

IV Leme mabi mi fukĩ ayekĩ nte loko a wo ɔto ni, míate ane kĩ mbi mi foe.

Hũhũ Kpalewa a Adzuma.

“Ntábi mi folets a kĩ ne kayokayi a, kitonekĩ nna ne mi sekẽ.

V Leme finyaa kĩ madzakũ nnaa oti a kĩ edo yĩ a sekẽ a, mi kame odima távia yĩ awã kĩ manaa a.

VI Finyaa, kĩ mbi mi folets a kĩ a, mi flee miwo ɔblo.

VII Leme mabi mi ɔnokɔali a kĩ fonene fokpa mi kĩ ndzakũ, kitonekĩ nte ntánaa ni, Obumenane a leláaya ne mi sekẽ. Leme nte ndzakũ nnaa ni, maado ye eya ne mi sekẽ.

VIII Ade nte eya ni, yaako katinya kame bati koto efõ binyi letsa a kã lenye tokpa, mo kadzi kpĩĩ, mo Baguma kotokako.

IX Yaako be koto ne tokpa sũ, kitonekĩ betáte yĩ bido.

X Yaako be koto bekoa binyi kadzi kpĩĩ kame, kitonekĩ manaa Nda sekẽ, kã miláabuki mimó yĩ,

XI ade baanyi letsa a kã lenye kotokaku, kitonekĩ beko katinya kũĩ kame akũ onyane a koto kokoe.

XII “Ndeĩ foletsa pii kã maabi mi, leme fõaba mi kalo finyaa.

XIII Leme nte Hũhũ a kã yanye onokwali ne Baguma akũ katsa a ya ni, yaafõ minyi Baguma akũ onokwali a flee a. Eláale kodzela ne ye moawe otumi akũ, mbom letsa a kã enu a odi mo yaale, ade yaafõ minyi fotsa a kã fõayaya a.

XIV Yaado yĩ obu enye yĩ kukũkpale etsa, kitonekĩ yaabi mi letsa a kã ete etomena yĩ sekẽ a.

XV Fotsa a kã fõnye Nda fude a flee, yĩ fude fõane. Ade foesũ nle kã Hũhũ a aanu etomena yĩ sekẽ eyaabi mi a.”

Fõtsa Bakolene Oblõ Kawo Mo Kawole Kamõ.

XVI Yesu le enamena lotõ kã, “Kite sukuloo kã miláabuki mimó yĩ, leme owi leláabuna kã míabuki mimó yĩ.”

XVII Adeke ye fotsa bakolene a badi via akũ kã, “Foe kayõ nye litsa kã yabi boe kã, ‘Kite sukuloo miláabuki mimó yĩ, leme owi leláabuna kã míabuki mimó yĩ.’ Ebuki ele kã, ‘Kitonekĩ manaa Nda sekẽ.’

XVIII Foletsa a kã ele kã, ‘Kite sukuloo’ a kayõ nye litsa? Boánu letsa a kã yale a kayõ!”

XIX Yesu m'ó k'í ye fotsa bakolene a we k'í bavia ye kale kadi, foesũ ebi be k'í, "Nle k'í kite sukuloo miláabuki mim'ó y'í, leme owi leláabuna k'í miábuki mim'ó y'í. Mb'oe f'oletsa k'í kame milamena kasa m'ó akũ a?"

XX Mabi mi ɔnokɔali a k'í míabe miwo ɔblo, leme katinya kame bati aam'ó kaw'ole. Míadi ay'oloh'ó leme mi ay'oloh'ó a aadani kaw'olekam'ó.

XXI Nte seme pi otsole ni, yawo ɔblo kitonek'í ye lubo kam'ó ɔd'ó a b'oa. Leme nte ema eyua a, yalela ye lubo kam'ó a, kitonek'í yam'ó kaw'ole k'í ema obi edo ne katinya kame.

XXII Ade aye f'ola f'okpa mi a. Finyaa miwo ɔblo, leme maabuki mm'ó mi, lok'oa mi tow'ole leka tidzi mi m'ó kaw'ole paa a k'í odima leláapuli ete ne mi awe a.

XXIII "Nte luwi a wo ɔto ni, miláabuki mivia y'í letsama. ɔnokɔali a mabi mi k'í, Nda aakpa mi letsa nye letsa k'í míavia ye ne y'í d'í akũ.

XXIV Kito keyawo finyaa k'í a, mitávia t'ó letsama ne y'í d'í akũ. Mivia, lok'oa míate, ayek'í mi kaw'olekam'ó aakp'ola.

Yesu Nya Katinya Kame Akũ.

XXV "Mabi mi f'oletsa k'í ne f'ogb'á kame. Leme loko aaya k'í nláabuki mbi mi f'oletsa ne f'ogb'á kame, mbom maabi mi Nda akũ f'oletsa pefee.

XXVI Nte luwi a wo ɔto ni, mivia ye fotsa ne y'í d'í akũ. Maátsa k'í y'í maavia ye nkpa mi,

XXVII kitonek'í Nda m'oa we a awe mi kale. Yawe mi kale kitonek'í miawe y'í kale ade mite mido k'í Baguma sek'ẽ nto ñya.

XXVIII Nuwī, ɔlega a sekē nto ñya ne katinya kame, ade finyaa madzakū ne katinya kame nnaa Nda sekē a.”

XXIX Ade ye fɔtsa bakolene a bi ye kī, “Dā, finyaa kō ale kodzela pefee, kī obuki aáboá fɔgbā.

XXX Finyaa kō bunyina kī onyina letsa nye letsa, ade fɔtásī kī odi abuki evia nɔ kale kadima a. Fukī fō bote budo kī Baguma sekē oto.”

XXXI Yesu kpa be mbuaye kī, “Finyaa kō mite mido?

XXXII Lɔkɔ aya ade liwo ɔto kɔkɔe malo, kī baapasam mi flee odi nye odi lenaa ye toto kame kite yī odi. Leme nné yī odi aate, kitonekī Nda deī ne yī sekē.

XXXIII Mbi mi fukī kī flee ayekī míakena ɔmoa mo yī bona lukudo. Katinya kame bati aafō mimó lubo. Leme mido ɔwɔle! Ñya katinya kame akū!”

XVII

Yesu Bɔa Mpaε Ne Ye Fɔtsa Bakolene a Lɔlɔ.

I Kī Yesu le fɔletsá kī eyua a, edela ane edā ode, ade ele kī, “Nda, ɔdɔū a bɔa. Dela nɔ Obi dī ne ode lɔkɔa nɔ Obi leme edela nɔ dī ne ode.

II Kitonekī ɔkpa ye otumi ne batidziwa flee akū ayekī yaakpa bati a kī ɔkɔa odo ne ye awe a nkpā kī elá kawūna a.

III Nkpā kī elá kawūna a nye kī baanyi nɔ ɔnɔkɔali Baguma keī a mo Yesu Kristo a kī odo fɔto a.

IV Ndela nɔ dī ne ode ne tite akū, ade ñyua adzuma a kī ɔkpa yī kī nkɛna a.

V Foesũ Nda, dɛla yĩ dĩ nɛ ode nɛ nɔ anɛ kame, ndɛ ayekĩ nna nɛ nɔ sɛkẽ fomɔ bebɔa katinya a.

VI “Inye nɔ ntsa bati a kĩ ɔnye nɛ katinya kame ɔkpa yĩ a. Nɔ bade banɛ, lemɛ ɔkɔa ɔkpa yĩ. Bɛkɛna nɛ nɔ kalɛ akũ.

VII Finyaa kɔ binyina kĩ letsa nye letsa kĩ ɔkɔa ɔkpa yĩ a flee to nɔ sɛkẽ.

VIII Nkɔa ɔlɛdo a kĩ ɔkpa yĩ a nkpa be, ade bɛtɛ ye a. Binyina kĩ ɔnɔkɔali fɔanɛ kĩ nɔ sɛkẽ nto, ade bɛtɛ bido kĩ nɔ lido yĩ a.

IX “Make aduli nɛ be lolɔ. Nlámɛna aduli kake nɛ katinya kame bati lolɔ, mbom nɛ bati a kĩ ɔkɔa odo nɛ yĩ awɛ a lolɔ, kitonɛkĩ nɔ bade banɛ.

X Yĩ bati a flee nɔ bade banɛ, ade ayea nɔ bade flee lemɛ nye yĩ bade a, ade bɛdɛla yĩ dĩ nɛ ode bɛtsámɛna be akũ a.

XI Ade finyaa maya nɛ nɔ sɛkẽ, mbuki nláa katinya kame, lemɛ be kɔ bideĩ nɛ katinya kame. Ɔlɛga Kpalɛwa, kɔa nɔ dĩ akũ kɔbɛ a kĩ ɔkpa yĩ a kadámɛna be akũ ayekĩ baakɛna ɔmɔa ndɛ ayekĩ bɔmɔ nɔ bɔnye ɔmɔa a.

XII Kĩ nna nɛ be sɛkẽ a, nkɔa nɔ dĩ akũ kɔbɛ a kĩ ɔkpa yĩ a ndámɛna be akũ. Ndã be akũ kĩ be kame odima táyɛla, mbɔɛntɛ oti a kĩ kɛnɛ kĩ ɛyɛla a, ayekĩ Katsɛlɛ Kpalɛwa foletsɛ a aaya nɛ foɛ kame.

XIII Lemɛ finyaa maya nɛ nɔ sɛkẽ, ade malɛ fukĩ bame nɛ katinya kame ayekĩ baamɔ kawɔlɛ kɛkpɔla nɛ be kame ndɛ ayekĩ yĩ malo mamɔ ke a.

XIV “Nkɔa nɔ ɔlɛdo a nkpa be lemɛ katinya kame bati kesĩ be, kitonɛkĩ bɛtáto katinya kame ndɛ ayekĩ yĩ malo ntáto katinya kame a.

XV Ntávia nɔ kī nyɛ be nɛ katinya kame, mbom mawã nɔ kī nyɛ be nɛ Okesĩne a awɛ kame.

XVI Nde ayekĩ ntáto katinya kame sũ ni, be malo benyɛ katinya kame bade.

XVII Kena be bati kpalewa kakpa nɔ akũ nɛ ɔnɔkoali a kame, nɔ kale a nyɛ ɔnɔkoali.

XVIII Ndo be nɛ katinya kame nde ayekĩ nɔ malo odo yĩ nɛ katinya kame a.

XIX Ade nɛ be sũ ni, nkpalɛ yĩ akũ nkpa nɔ ayekĩ be malo baakpalɛ be malo akũ nɛ ɔnɔkoali a kame bekpa nɔ.

Yesu Bɔa Mpae Ne Bate Badone Flee Lɔlɔ.

XX “Nnɛ bati kĩ odi lɔlɔ mabɔa mpae, mbom mabɔa nkpa bati a kī baate yĩ bido nɛ foletsa a kī baabi be a sũ.

XXI Make nɔ aduli kī fɔ be flee bekɛna ɔmɔa. Nda, fɔ be malo bɛna nɛ boe kame nde ayekĩ odeĩ nɛ yĩ kame, ade yĩ malo ndeĩ nɛ nɔ kame a. Fɔ bekɛna ɔmɔa ayekĩ katinya kame bati aate bido kī nɔ lido yĩ.

XXII “Ndeɛla be buĩ nɛ ode nde ayekĩ ɔdeɛla yĩ dī nɛ ode, ayekĩ baakɛna ɔmɔa nde ayekĩ bɔmɔ nɔ bonyɛ ɔmɔa a.

XXIII Yĩ ndeĩ nɛ be kame ade nɔ malo odeĩ nɛ yĩ kame, kī baakɛna ɔmɔa bekpɔla, ayekĩ katinya kame bati aanyi kī nɔ lido yĩ. Ade baanyi kī awɛ be kale nde ayekĩ awɛ yĩ kale a.

XXIV “Nda, mawɛ kī bati a kī ɔkɔa ɔkpa yĩ a bɛna nɛ awã kī ndeĩ a, ayekĩ baamɔ yĩ kukũkpale a kī ɔkpa yĩ a, kitonekĩ ɔwɛ yĩ kale fɔmɔ biyi katinya kayɔ.

XXV “Nda, Oti Kpĩĩ, katinya kame bati linyina no leme yi ko ñnyina no, ade bati ki leme nyina ki no lido yi a.

XXVI Ñnye no ntsa be yededeede, ade maakanye no nkatsa be, ayeki odo a ki odei okpa yi a aana ne be kame, lokoa yi malo maana ne be kame.”

XVIII

Yesu Kapi.

I Ki Yesu boa mpaε ki eyua a, bemε ye fotsa bakolene a bedzakũ ne awã, benanyina Kidron kawobi a ade benawo ne kugua futse koba kudi kame a.

II Yuda a ki enye ye ekpa a, nyina awã, kitoneki lokoloko Yesu mo ye fotsa bakolene a awe katsena ne awã.

III Foesũ Yuda kpã Roma sodzafō mo Asoli Kola akũ badāmenane a ki basofonokōē mo Farisifo do a enamena koba a kame. Benεε kawũkano fotsa, tesedza mo tibia tenawa.

IV Ayeki Yesu nyina fotsa a ki fōaya ne ye akũ a flee sũ ni, ene eya ne loto evia be ki, “Owei miawe?”

V Bekpa ye mbuaye ki, “Yesu Nazaretni a.”

Yesu bi be ki, “Amo yi.” Yuda a ki enye ye ekpa a leme dzē ne awã.

VI Ki Yesu bi be ki, “Amo yi” a, be flee benaa litiliti benato ne tite.

VII Ade Yesu buki evia be ki, “Owei miawe?”

Bekpa ye mbuaye ki, “Yesu Nazaretni a.”

VIII Yesu bi be ki, “Mbi mi kokoe ki yi nye ye, foesũ nte yi miawe ko ni, mifō bati ki bedzakũ.”

IX Ελε fukĩ ayekĩ kale a kĩ ele eyi a aaya ne foe kame pεpεpe kĩ, “Nda, bati a kĩ okoa odo ne yĩ awe a kame odima táyela.”

X Ade Simon Petro nye kopã a kĩ enee a ebaa Osɔfɔnokɔẽ Flee a osumune sɔmɔna sɔto emuni a. Osumune a dī nye Malko.

XI Ade Yesu bi Petro kĩ, “Koa no kopã a kado ne kuvũ kame! Okona kĩ nláamoa lubo kamo kopu a kĩ Nda koa ekpa yĩ a mbɔee?”

Yudafɔ Kpã Yesu Benadzemena Ne Hana Anɛ.

XII Ke liti a, Roma sodzafɔ mo be banokɔẽ, mo Yudafɔ Asɔli Kola akũ badāmenane a pi Yesu ade bisui ye a.

XIII Benya lotɔ bekpã ye benamena Hana sekẽ. Hana kĩi nye Kayafa, kĩ yanya Osɔfɔnokɔẽ Flee ne kateli a kame a otse.

XIV Ade Kayafa kĩi lemɛ lekpa Yudafɔ banokɔẽ a adzuni kĩ fɔnene fɔbẽ kĩ oti moa aku ne omaĩ a lolɔ.

Petro Sĩ Kĩ Enyĩna Yesu.

XV Simon Petro mo fɔtsa okolene bebã odi tomɔ Yesu ne liti. Fɔtsa okolene bebã kĩi a nye Osɔfɔnokɔẽ Flee a oti nyiwa, foesũ etomɔ Yesu ewo ne Osɔfɔnokɔẽ Flee a fɔletsɔ kadzekɔ.

XVI Lemɛ Petro fɔ edza ne kanya ne onyukpẽ. Ade fɔtsa okolene bebã a né, enaa kanya enalemɔ oyitsɔ a kĩ yadã onyukpẽ akũ a kodzela, ade ekpã Petro ewomena ne tɔto a kame a.

XVII Oyitsɔ a kĩ yadã onyukpẽ akũ a via Petro kĩ, “No malo nné onyole kĩi fɔtsa bakolene a kame omɔa anɛ?”

Petro kpa mbuaye kĩ, “Oowo, ñnyé ye fɔtsa okolene.”

XVIII Osili na, foesũ basumune mo bikĩ badzole awã akũ a tena futuã fi bedza bisinya bawa foe. Petro lеме nadza ne be owẽ ekawa fi a.

Ɔsofonokoẽ Flee a Via Yesu Foletsa.

XIX Ɔsofonokoẽ Flee a via Yesu foletsa ne ye fotsa bakolene mo ye fotsa katsa a akũ.

XX Ade Yesu kpa ye mbuaye kĩ, “Male kodzela daa ne kanade kakpa odi nye odi. Matsa fotsa ne Yudafɔ fotsenakɔ mo Baguma Asoli Kola a kame, awã kĩ bati a flee atsena, ade maále letsama ne kabɛla kame a.

XXI Mo nde sũ avia yĩ foletsa? Via bikĩ binu yĩ foletsa a. Ade be nyina letsa a kĩ nle a.”

XXII Kĩ Yesu le foletsa kĩ a, bikĩ badzole awã akũ a kame ɔmoa bale ye awe ne ɔloto ade ebi ye kĩ, “Nde mo odo owole okpa Ɔsofonokoẽ Flee a mbuaye lomo?”

XXIII Yesu kpa ye mbuaye kĩ, “Nte nle foletsa kpa ni, bi odi nye odi ne awĩ kĩ letsa a kĩ foane. Leme nte letsa a kĩ nle a nye onokɔali ni, litsa sũ obale yĩ awe?”

XXIV Ade Hana fɔ bekpã Yesu kĩ ebuki edeĩ ne towẽ kame a bema Kayafa, Ɔsofonokoẽ Flee a.

Petro Buki Enunya Kĩ Enyina Yesu.

XXV Ne loko a na kame a, Petro buki edzẽ yawa fi. Ade bati bebã a via ye kĩ, “Mbɔɛ no malo ye fotsa bakolene a kame ɔmoa ane?”

Leme Petro nunya kĩ, “Oowo, ãnyé ye fotsa okolene.”

XXVI Ɔsofonokoẽ Flee a basumune a kame ɔmoa kĩ ye akũ oti soto Petro baa emuni a via ye kĩ, “Ntámo no ne ye sekẽ ne kobã a kame?”

XXVII Petro buki ελε κῖ, “Oowo!” Deedimɔape ɔkɔko be.

Βεκπᾶ Yesu Benamena Pilato Sekē.

XXVIII Ɔnɔne tutuutu a, bekpᾶ Yesu bitomena Kayafa sekē benamena abāā ɔnɔkɔē a tɔtɔ kame. Yudafɔ banɔkɔē a mɔawe táwo ne abāā tɔtɔ a kame, kitonekῖ bewe κῖ be akū ekpale ne be amanie onukpē ekpa Wuda Katē funitsā a kanya.

XXIX Foesū Pilato né enaa be sekē evia be κῖ, “Litsa fɔletsɔ mibɔe ne oti κῖ akū?”

XXX Bekpa ye mbuaye κῖ, “Nte nné tɔkpa ɔkenane yane ni, kufe botákpᾶ ye bɔma nɔ.”

XXXI Ade Pilato bi be κῖ, “Kekō mi mɔawe mikpᾶ ye minaadzemo ye ne mi mbla onukpē.”

Yudafɔ banɔkɔē a kpa ye mbuaye κῖ, “Betákpᾶ boe osi κῖ bɔako oti odima.”

XXXII Fukῖi ya lomɔ ayekῖ fɔletsɔ a κῖ Yesu le eyi ne wuda odu κῖ yaaku a akū a fɔya ne foe kame.

XXXIII Pilato dani ewo ne abāā tɔtɔ kame ade eve Yesu evia ye κῖ, “Nɔ nye Yudafɔ legā a mbɔee?”

XXXIV Yesu kpa ye mbuaye κῖ, “Nɔ mɔawe avia yῖ fɔletsɔ κῖi, mbɔee κῖ bati bebā libi nɔ yῖ akū fɔletsɔ?”

XXXV Pilato kpa ye mbuaye κῖ, “Akɔna κῖ Yudani mane? Nɔ mɔawe kade bati mɔ basɔfɔnɔkɔē a lekpᾶ nɔ beme yῖ. Litsa ɔkena?”

XXXVI Yesu kpa ye mbuaye κῖ, “Yῖ legākanyakō táto katinya κῖi kame. Nte yῖ legākanyakō kito katinya κῖi kame ni, kufe yῖ basumune a pili yῖ lolɔ, mɔ baakɔa yῖ bido ne Yudafɔ awe kame. Leme yῖ legākanyakō a táto katinya κῖi kame.”

XXXVII Pilato via ye κῖ, “Foesū legā ane kō?”

Yesu kpa mbuaye kī, “Nò lèlè kī legā manè. Yī kō ni, ade fukī sū bema yī a, ade foesū ìya nè katinya kame kī mayaale kòdzela nè ɔ̀nɔ̀kɔ̀ali kale a akū. Odi nye odi kī eto ɔ̀nɔ̀kɔ̀ali a kame ni, yatse yī.”

XXXVIII Pilato via ye kī, “Litsa nye ɔ̀nɔ̀kɔ̀ali a?”

Pilato Kɔ Yesu Kɔ̀tɔ̀ Ekpa Wuda.

Kī Pilato lè fòletsá kī eyua a, ené enaa Yudafo a sèkè nè kanya ade ebi be kī, “Ntámɔ̀ tɔ̀kpa tidima nè oti kī akū kī makɔ̀ ye kɔ̀tɔ̀.

XXXIX Leme nè mi amanie onukpè ni, kene kī nfone kola bawane a kame ɔ̀mɔ̀a nkpa mi nè Wuda Katè Luwi kanya kame. Miawe kī nfone Yudafo legā a awe nkpa mi mbɔ̀e?”

XL Ade bebɔ̀a fɔ̀wɔ̀la bèle kī, “Oowo, nné ye bɔ̀awe! Baraba bɔ̀awe!” Baraba nye oti kī eyidza edza nè abāã akū.

XIX

I Ade Pilato fō bekpā Yesu bedzakūmena benabo ye mɔ̀ mple.

II Sodzafo kɔ̀a fòtsɔ̀lewe beno legābɔ̀e betsa ye. Kī bido ye atadiè ngbā biyua a,

III bifuã ye bibi ye kī, “Yiiduu! Yudafo Legā o-o!” Ade bebalebale ye awe nè toloto a.

IV Ke liti a, Pilato buki ené enaa kanya enabi bati kodabu a kī, “Midã, maakpā ye nnemena mma mi mimó kī ntámó mfumsu adima nè ye akū kī makɔ̀ ye kɔ̀tɔ̀.”

V Adeke Yesu né eya nè kanya, fòtsɔ̀lewe lobɔ̀e a tsane nè ye lolɔ̀, edeĩ nè atadiè ngbā a kame. Pilato bi bati a kī, “Midã! Amɔ̀ oti a nè awĩ!”

VI Kĩ basofonokõẽ mɔ Asoli Kola akũ badzɔlɛɛ a mɔ ye a, bebɔa fɔwɔla kĩ, “Bɔa ye nɛ asendua akũ! Bɔa ye nɛ asendua akũ!”

Ade Pilato bi be kĩ “Mi mɔawɛ mikpã ye minaabɔa ye nɛ asendua akũ. Yĩ kɔ ntámɔ kĩ ɛkɛna letsa kpa lidima.”

VII Yudafɔ a kpa ye mbuayɛ kĩ, “Boe kɔ budeĩ mbla, ade nɛ mbla a onukpẽ ni, kĩ kɛnɛ kĩ eku, kitonɛkĩ ɛkɛna ye akũ Baguma Obi.”

VIII Kĩ Pilato nu fɔletsã kĩ a, ebuki evila ɛba kɔkɔɛ a.

IX Foesũ emuniki ɛnaa abãã tɔtɔ a kamɛ ade evia Yesu kĩ, “Ndia oto?”

Lɛmɛ Yesu tákpa ye mbuayɛ adima.

X Ade Pilato bi ye kĩ, “Hei! Aákpa yĩ kalɛ a mbuayɛ? Mbɔɛɛ onyína kĩ ndeĩ kɔbẽ kĩ mafɔnɛ nɔ awɛ, ãye kĩ mafɔ bebɔa nɔ nɛ asendua akũ?”

XI Yesu kpa ye mbuayɛ kĩ, “Ntɛ betakpa nɔ kɔbẽ bitomɛna ode ni, kufɛ ɔláana kɔbẽ nɛ yĩ akũ. Foesũ oti a kĩ ɛnyɛ yĩ ɛkpa nɔ a tɔkpa bẽ nɔ tide.”

XII Kĩ Pilato nu fɔletsã kĩ a, ɛwɛ kĩ yatsã osi nyɛ osi akũ ɛfɔnɛ ye awɛ, lɛmɛ Yudafɔ a bɔa fɔwɔla kɔɔba kĩ, “Ntɛ ɔfɔnɛ ye awɛ ni, fɔatsã kĩ onyé Roma Lɛgãnokõẽ ɔkɔba! Odi nyɛ odi kĩ ɛkɛna ye akũ Lɛgã ni, eyidza ɛdza nɛ Roma Lɛgãnokõẽ akũ!”

XIII Kĩ Pilato nu fɔletsã kĩ a, ɛkpã Yesu ɛnamɛna kanya ade ye mɔawɛ ɛnadzi nɛ fɔletsã kadzɛ lukpo kamɛ nɛ kakɔ a kĩ bave kĩ Boe Ɔda a. Bave kakɔ a nɛ Hebri tide kamɛ kĩ Gabata.

XIV Lokɔ a nyɛ Wuda Katẽ kukũmanɛ luwi, ade fɔana ndɛ suwa tɔdɔũ ewua-nviã a.

Ade Pilato bi Yudafɔ a kĩ, “Amɔ mi Lɛgã a nɛ awĩ!”

XV Bati a boa fowola kī, “Kpã ye kanamena! Kpã ye kanamena! Boa ye ne asendua akū!”

Ade Pilato via be kī, “Miawe kī mboa mi legã ne asendua akū?”

Basofonokõ a kpa mbuaye kī, “Bólá Legã lidima keba Roma Legãnokõ!”

XVI Adeke Pilato fone Yesu awe ekpa sodzafõ a kī benaaboa ye ne asendua akū a.

Bebõa Yesu Ne Asendua Akū.

Foesū bekpã Yesu bedzakūmena.

XVII Ye mōawe elo ye asendua enawo awã kī bave Oti Lolo Fotsõ. Bave awã ne Hebri tide kame kī Golgata.

XVIII Ade awã naa, bebõa ye ne asendua akū a. Bebõa bati nviã bebã ne asendua akū bibumõ ye, omõa ne ye seba, oyade ne ye somõna, ade Yesu deĩ ne be kayite a.

XIX Pilato tsele ye onukpẽ katsua fõletsã bebõa ne asendua a lolo nyangẽ. Fõletsã a kī etsese nye, “Yesu Nazaretni, Yudafõ Legã a.”

XX Yudafõ pii kã fõletsã a kī betsele a, kitonekĩ awã kī bebõa Yesu a fuãmõ omato kame. Pilato tsele fõletsã a ne Hebri, Roma mō Hela leme tide kame.

XXI Ade basofonokõ a sī fõletsã a, ade bibi Pilato kī, “Tatsele kī, ‘Yudafõ Legã,’ mbom ‘Oti kīĩ le kī, ‘Yĩ nye Yudafõ Legã a.’ ”

XXII Pilato kpa be mbuaye kī, “Letsã a kī ntsele ni, ntsele de kókõ.”

XXIII Kī sodzafõ a boã Yesu ne asendua akū biyua a, bebõe ye tetadie besẽ ne kutsu ena kame, ade sodzafõ a kame odi nye odi bõe kamõa a. Ke

liti a, bebɔe ye atadie amede a kī betápam, mbom beno ye kito sɔmɔ kenake kayo a.

XXIV Sodzafo a bi akū kī, “Mitafō boyele atadie a, mbom mifō bota bavulibi bómó oti a kī yaate ye.”

Foletsa kī ya nde ayekī Katsɛle Kpalɛwa a aaya ne foe kame kī,

“Besē yī tetadie bekpa akū.

Ade beta bavulibi ne yī atadie akū a.”

Ade letsa a kī sodzafo a kɛna a.

XXV Finyaakīi a, Yesu ɔma, ɔma ɔwaētsole, Maria kī enye Clopa ɔtsō, mɔ Maria Magdalani dzē ne Yesu asendua a ɔwē.

XXVI Kī Yesu mó ɔma mɔ ye fotsa ɔkolɛɛ a kī yaátunɔ kale a kī bedzē ne awā a, ebi ɔma kī, “Mma, dā ade nɔ obi ne awī a!”

XXVII Ade ebi fotsa ɔkolɛɛ a kī, “Dā, ade ama ne awī a!” Kito luwi a akū a, fotsa ɔkolɛɛ a kpā Maria enamɛna ne ye mɔawe toto kame.

Yesu Kaku.

XXVIII Finyaa Yesu nyi kī biyua letsa nye letsa kakɛna. Ayekī fɔafō Katsɛle Kpalɛwa a leya ne foe kame sū ni, ɛɛ kī, “Ɔmɔado ako yī.”

XXIX Kugumi kudi keni ne awā kī kuyi mɔ waī yilawa. Ade bekɔa ɔsapɔ beta waī a bekɔa bido ne otse akū benatamɔ Yesu onukpē.

XXX Kī Yesu mɔa bave a eyua a, ɛɛ kī, “Fuwoli!” Ɛkɛna lolɔ ade ye kawɛya ne a.

Betsɔɛ Yesu Lotsɔɛ Ne Seklabi.

XXXI Luwi a nye Efieda, ade Kawɛya Luwi kī litomɔ de a nye luwi kpalɛwa lekpa Yudafɔ, foesū betáwe kī banɔkpa a bekahɔ ne asendua

akū Kaweya Luwi a liwo ɔto. Ne fukĩ sũ Yudafo banokõẽ a navia Pilato kĩ ekpa be osi benaaveliveli bati a kĩ bebɔa ne asendua akū a abɔa, lokɔa benye be banokpa a.

XXXII Foesũ sodzafɔ a yaveli oti ɔtonyade mo oti bebã a kĩ bebɔa ne asendua akū bibumɔ Yesu a abɔa.

XXXIII Leme kĩ biwo Yesu akū a, bemó kĩ eku kɔkɔe, foesũ betáveli ye abɔa.

XXXIV Leme be kame ɔmoa kɔa lotsɔe etsɔe ye seklabi, ade deedimɔape babɔane mo mui ne a.

XXXV Oti a kĩ emó fɔtsa kĩ lidi adansie ne foe akū ayekĩ nɔ malo aate odo. Letsa a kĩ ele a nye ɔnokɔali, ade enyina pefee kĩ ɔnokɔali ele a.

XXXVI Fukĩ ya ayekĩ Katsɛle Kpalewa foletsa a aaya ne foe kame kĩ, “Beláave ye lotsõ lidima.”

XXXVII Foletsa bebã ne Katsɛle Kpalewa a kame leme le kĩ, “Bati aako ane bedã oti a kĩ betɔe ye lotsɔe a.”

Yesu Kabila.

XXXVIII Ke liti a, Yosef kĩ eto Arimatia yavia Pilato kĩ ekpa ye osi ebɔe Yesu ɔnokpa a. Yosef kĩ nye Yesu fɔtsa ɔkolene odi ne kabela kame, kitonekĩ ekavila Yudafo banokõẽ a. Pilato kpa osi, ade Yosef yabɔe ɔnokpa a edzakumena a.

XXXIX Ade Nikodemo kĩ enya lotɔ enaa Yesu sekẽ mo lenye a leme tomɔ Yosef eya a. Enne tutsonu mo olẽ kĩ bekɔa klubɔũ mo odi kĩ baye aloa bekɛna eyamena. Te olome kame aana nde kilo taale.

XL Banyole nviã a kɔa tutsonu a bikputa Yesu ɔnokpa a, ade bekɔa aklala ovoe bisuli ye nde ayekĩ Yudafo akɛna ɔnokpa fomɔ babila ye a.

XXI Kòbã kudi deĩ ne awã kĩ beboã Yesu ne asendua akũ a. Linike voẽ kĩ betábila oti tũ deĩ ne kòbã a kame.

XXII Ayekĩ luwi a nye Kukũmane luwi lekpa Kaweya Luwi a, ade kĩ awã leme fuã be sũ ni, bekõa Yesu onokpa a bibila ne awã.

XX

Bemó Kĩ Linike a Waa Luto.

I Ekwansieda onone tutuutu a, kĩ foko tákpale tũ a, Maria Magdalani naa linike a owẽ, ade emó kĩ bitinya de a ne linike a onukpẽ.

II Foesũ ewula atse enaa Simon Petro mo fotsa okolene a kĩ Yesu látunõ kale a sekẽ, ebi be kĩ, “Beyabõe boe òlate ne linike a kame bedzakũmena, ade bunyina awã kĩ bekõa ye biyi a.”

III Ade Petro mo fotsa okolene kĩ a yidza benaa linike a owẽ.

IV Be nviã a flee bekawula atse, leme fotsa okolene kĩ a wula atse etẽ Petro enya lotõ ewo linike a owẽ.

V Ekena akũ edã de kame emó aklala a kĩ bekõa bisuli onokpa a, leme etáwo ne linike a kame.

VI Simon Petro kĩ etomo ye ne liti a, ya ade ye kõ ewo ne linike a kame a. Emó aklala owoe a kĩ ewaa ne awã.

VII Emó lima a kĩ bekõa bisui Yesu lolõ a leme ne awã, leme lewaa ne aklala a owẽ, mbom bibuta de biyi de lite.

VIII Ke liti a, fotsa okolene bebã a kĩ enya lotõ ewo linike a owẽ a, leme wo ne de kame. Emó aklala mo lolõ kasui lima a, ade ete edo a.

IX Ke malo ni, betánu kayõ kĩ Katsese Kpalawa a le kĩ kene kĩ Yesu eyidza eto kanokpa.

X Ke liti a, fɔtsa bakɔlɛnɛ a dzakũ benaa be toto kame.

Yesu Nye Ye Akũ Etsa Maria Magdalani

XI Leme Maria dza ne linike a owẽ ekabe. Kĩ ekabe a, ekena akũ edã linike a kame,

XII ade emó ode foto banyane nviã kĩ bideĩ ne tetadie fitaa kame, kĩ bidzi ne awã kĩ bewóla Yesu a. Omɔa dzi ne ye lolɔ nyange, obebã dzi ne ye abɔa kayɔ.

XIII Bivia Maria kĩ, “Boe omã, litsa sũ abe?”

Maria kpa be mbuaye kĩ, “Bebɔe yĩ ɔlate benamena, ade ãnyina awã kĩ bekɔa ye benamena a.”

XIV Kĩ ele fukĩ eyua a, edani akũ ade emó Yesu kĩ edzẽ ne awã, leme etányi kĩ ye yane.

XV Yesu via ye kĩ, “Boe omã, nde sũ abe? Owei awe?”

Leme Maria kɔna kĩ oti a kĩ yadãmena awã a yane, foesũ ebi ye kĩ, “Ɔnokɔẽ, nte no leɔɔe ye ni, bi yĩ awã kĩ oyi ye lokɔa nnaabɔe ye.”

XVI Ade Yesu ve ye kĩ, “Maria!”

Edani etselamo ye ade ele ne Hebri tide kame kĩ, “Raboni!” Foe kayɔ nye Fɔtsa ɔtsanɛ.

XVII Yesu bi ye kĩ, “Tata yĩ, kitonekĩ ntámuniki nnaa ode ne Nda sekẽ tɔ. Leme naa nwaẽ ame sekẽ kabi be kĩ mmuniki manaa oti a kĩ enye Nda mo mi ɔlega, yĩ Baguma mo mi Baguma a sekẽ.”

XVIII Foesũ Maria Magdalani a nabi fɔtsa bakɔlɛnɛ a kĩ emó ɔlate a, ade ebi be foletsa a kĩ Yesu bi ye a flee a.

Yesu Nye Ye Akũ Etsa Ye Fɔtsa bakɔlɛnɛ a.

XIX Ne Ekwansieda a na olobe a, fɔtsa bakɔlɛnɛ a kpota ne kola kame, ade bebale onyukpẽ

tupunu a flee, kitonekĩ be kavila Yudafo banokõẽ a. Letaleta Yesu yane edza ne be kayite, ade ebi be kĩ, “Lukudo litomõ mi.”

XX Kĩ ele fukĩ eyua a, ekõa ye awe mo seklabi etsa be. Adeke kawõle de fõtsa bakõlene a kĩ bemõ Jlate a.

XXI Yesu buki ebi be kĩ, “Lukudo litomõ mi! Nde ayekĩ Nda do yĩ a, ade aye mado mi a.”

XXII Adeke eweya eko ne be akũ, ele kĩ, “Mite Hũhũ Kpalewa a.

XXIII Nte mikõa bati tokpa mite be ni, bekõa bite be, leme nte mitákõa be tokpa mite be a ni, betákõa te bite be.”

Yesu Nye Ye Akũ Etsa Toma.

XXIV Kĩ Yesu ya a, Toma kĩ enye fõtsa bakõlene ewua-nviã a kame omõa, kĩ bibuki bave Ata a, tãna ne ye bade a kame.

XXV Foesũ fõtsa bakõlene bebã a bi ye kĩ, “Bomõ boe Jlate a!”

Ade Toma bi be kĩ, “Nte ntãmõ ye awe kame tiplego fõokpa a, nkõa lawobi nte ne fõokpa a akũ ndo awe ne ye seklabi ni, nláate ndo da.”

XXVI Ne fuwi elẽ liti a, fõtsa bakõlene a buki bekpõta ne kõla a kame, ade Toma leme na ne be kame a. Be bale tupunu a flee, leme Yesu yadza ne be kayite ade ele kĩ, “Lukudo litomõ mi!”

XXVII Adeke ebi Toma kĩ, “Kõa nõ lawobi kate ne awĩ, kadã yĩ awe kame. Yo kõkpo kado awe ne yĩ seklabi kame. Fõ atsindze kate, lõkõa kate kado!”

XXVIII Toma bi ye kĩ, “Yĩ Jlate mo yĩ Baguma!”

XXIX Ade Yesu bi ye kĩ, “Ayekĩ omõ yĩ sũ õte odo. Baguma hila bikĩ betãmõ yĩ, leme bete bido a!”

Letsa a Kĩ Lenye Ovoli Kĩ Botae.

XXX Ne ɔnokɔali kame ni, Yesu kena awāwā fɔtsa bebā pii ne ye fɔtsa bakɔlene a ane, kĩ betátsele bido ne ovoli kĩ kame.

XXXI Leme betsele fukĩ biyi ayekĩ míate mido kĩ Yesu nye Kristo, Baguma Obi, ade mite ye mido ni, míatsā ye akū mina nkpā kĩ ela kawūna a.

XXI

Yesu Nye Ye Akū Etsa Ye Fɔtsa Bakɔlene Evũkɔnɔ.

I Ke liti a, Yesu buki enye ye akū etsa ye fɔtsa bakɔlene ne Tiberia Lutubu Baũ a abui. Ayekĩ enye ye akū etsa a nye.

II Luwi a, ye fɔtsa bakɔlene badi kpɔta. Ade be nye Simon Petro, Toma kĩ bave Ata obi, mɔ Nataniel kĩ eto Kana ne Galilea tite akū, mɔ Zebedeo babi mɔ Yesu fɔtsa bakɔlene bebā nviā.

III Ade Simon Petro bi be kĩ, “Manaata asau.”

Bibi ye kĩ, “Bóatomɔ nɔ bɔnaa.” Foesũ benawo ne ɔkɔlo kame benaa, leme lenye a flee betánye letsama.

IV Kĩ kade aya kanyina kɔ a, Yesu ya edzẽ ne ɔwo abui, leme fɔtsa bakɔlene a linyina kĩ Yesu yanɛ.

V Ade evia be kĩ, “Bapopo, mbɔee mitánye kɔfɔabi kudima?”

Bekpa ye mbuaye kĩ, “Oowo!”

VI Yesu bi be kĩ, “Mita asau ne ɔkɔlo a somona semake lokɔa míana kɔfɔabi a kudi.” Ade beta asau a benye kɔfɔabi beblebee kĩ betápuli bevele benemena.

VII Fɔtsa ɔkɔlene a kĩ Yesu látunɔ kale a bi Petro kĩ, “Boe ɔlate a yanɛ!” Kĩ Petro nu kĩ boe ɔlate

yanε a, εβωε ye atadie anyanglede efli ne kate, kitonekĩ edzi odzo, ade evenya ewo ne mui a kame a.

^{VIII} Fɔtsa bakolene nkaε a ta okolo a, bevele asau a kĩ eyi mo kofabi a beyamena ne owo abuĩ a. Awā kĩ bena a mo owo abuĩ lelá lugo, fɔana ndε abasam oha.

^{IX} Kĩ biduma ne okolo a kame a, bemó kĩ betena futuā fi kĩ kofabi teĩ ne foe akū, ade abodoo adi leme waa ne awā a.

^X Ade Yesu bi be kĩ, “Mikɔa kofabi a kĩ minye finyaa kudi miyamena.”

^{XI} Simon Petro wo ne okolo a kame, enavele asau a eyamena ne lowo tuni. Kofabi baũ baũ oha moa mo aduenum elale yi asau a. Tito kĩ kofabi a pone malo ni, asau a tákpeli.

^{XII} Ade Yesu bi be kĩ, “Miyaanya.” Leme fɔtsa bakolene a kame odima tádo owole evia ye kĩ, “Owei anε?” kitonekĩ binyina kĩ Boe ɔlate a yanε.

^{XIII} Foesū Yesu nabɔε abodoo a ekɔa ekpa be, ade ayea εβωε kofabi a leme ekpa be a.

^{XIV} Ade fukĩ nyε lelade kĩ Yesu nyε ye akū etsa ye fɔtsa bakolene, kĩ Baguma dzela ye etomena kanokpa a.

Yesu Le Kodzela Mo Petro.

^{XV} Kĩ benya biyua a, Yesu via Simon Petro kĩ, “Simon, Yona obi, awε yĩ kale kaba ayekĩ bati bebā kĩ a awε yĩ kale a?”

Ekpa ye mbuaye kĩ, “Oo, Boe ɔlate! Onyina kĩ mawe no kale.”

Ade Yesu bi ye kĩ, “Dāmena yĩ bavelibi akū.”

XVI Yesu buki evia ye leyade kī, “Simon, Yona obi, awε yī kale?”

Petro kpa ye mbuaye kī, “Oo, Boe ɔlate! Nɔ mɔawe onyina kī mawe nɔ kale.”

Ade Yesu bi ye kī, “Dāmɛna yī baveli a akū.”

XVII Yesu buki evia Petro lelalde kī, “Simon, Yona obi, awε yī kale?”

Petro wo ɔblo kitonekī Yesu via ye lelade kī, “Awε yī kale?” Foesū ebi Yesu kī, “Boe ɔlate, nɔ mɔawe onyina letsa nye letsa. Nɔ mɔawe onyina kī mawe nɔ kale!”

Ade Yesu bi ye kī, “Dāmɛna yī baveli a akū.

XVIII Mabi nɔ nε ɔnɔkoali kame kī loko a kī onye opopo a, apuli kafili lima, kanaa kako nye kako kī awε, lemε nte ɔde a ni, aadzela akpɔ, oti bebā lifili nɔ lima, ekpā nɔ enamena awā kī aawe kī anaa.”

XIX Yesu le fukī ekɔa etsa wuda odu a kī Petro aaku, ekɔa enye Baguma kukūkpale a etsa.

Ke liti a, Yesu bi ye kī, “Tomɔ yī.”

XX Petro dani ade emó fɔtsa ɔkolene a kī Yesu látuno kale a kī etomɔ be nε liti yaya. Ade fɔtsa ɔkolene kī lidzi emenamɔ Yesu kī bidzi bekanya, ade evia ye kī, “Boe ɔlate, owei aanye nɔ ekpa a?”

XXI Kī Petro mó ye a, evia Yesu kī, “Boe ɔlate, litsa aaya nε oti kī akū?”

XXII Ade Yesu kpa ye mbuaye kī, “Nte mawe kī edzi nkpā kenaawo kī maaya a ni, fowɔdabe tsela nɔ akū? Nɔ kɔ, tomɔ yī!”

XXIII Fɔletsa kī gba nε Yesu batomenane a kame kī fɔto onyane kī leláaku. Lemε Yesu tále kī eláaku, mbom kale ele kī, “Nte mawe kī edzi

nkpã kenaawo kĩ maaya a ni, fòdabe tsela no akũ?”

^{XXIV} Ade fotsa ɔkɔlɛnɛ kĩ adi adansiɛ nɛ fɔletsã kĩ akũ a, ade ye lɛmɛ letsɛɛ foe eyi a. Foesũ bunyina kĩ letsã a kĩ ɛɛ a nyɛ ɔnɔkɔali.

Fɔletsã Fuwũnade.

^{XXV} Fotsã bebã pii deĩ kĩ Yesu kena. Ntɛ katsɛɛ bɛtsɛɛ foe flee biyi fɔmɔa fɔmɔa ni, nkɔna kĩ katinya kĩ flee kame malo leláana kakokõ kekpa tuvoli a kĩ baatsɛɛ a.

Baguma Apam Vɔɛ a Tɔwuli
Tɔwuli: Baguma Apam Vɔɛ a Tɔwuli New Testament
copyright © 2008 Wycliffe Bible Translators, Inc.

Language: (Tɔwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 28 Dec 2024 from source
files dated 29 Jan 2022

68df0193-2981-5275-8994-8f743fe01e5e